

## **Ka tisa-ni rigixxi'akana ge Jesús-ni ka nu ben Marcos-ni**

*Juan benne rugadi indaha rekie rigixxi'e ge  
Jesús-ni*

*(Mt. 3:1-12; Lc. 3:1-9, 15-17; Jn. 1:19-28)*

<sup>1</sup> Nii ridulo ka tisa ka nu rigixxi'akana ge Jesucristu benne anka Xi'in Tata Do Yebáha.

<sup>2</sup> Ukaba atti tteba ra lo yetsi ben profeta Isaías-ni. Lo yetsiha rinne Tata Do Yebáha rulise Jesús-ni, ree:

Neti idhelhaa ttu benne tsie nnerue lolu kini kixxi'e ka tisa kia-ni.

Benneha idhalie neda gelu.

<sup>3</sup> Lo yu bisi ata lanú benne se'e, niha riyien tsi'i benneha rinnebie idisa, ree:

“Gwalegixxa tse neda ge benne anke Xxanari'iha. Gwalolixxa neda kini dhabie.”

<sup>4</sup> Aníha-ba ben Juan benne rugadi indaha tti ugwekie lo yu bisiha, rigixxi'anie ka benne kini odúna ke nna odaxxuke neda ge Tata Do Yebáha, nianna gadike inda kini anáchu nna ixú elha xen lasi ge ka tulha ruinkeha.

<sup>5</sup> Iyába ka benne se'e lhe'esi Jerusalén-ni lhe ka benne se'e itúba daka Judea-ni lhe, risinke ata reki Juan-ni, rigixxi'ake ge ka tulha ruinke nna rugadie ke inda lhe'e yoo Jordán-ni.

<sup>6</sup> Juan-ni itsa xo camellu-ba uka xoe nna udhí lhe'ebie ttu yieti. Nu xixxi ge betsirúba lhe

kutsittaba lhe utobie ugwekie <sup>7</sup> nna rigixxi'anie ka benne, ree ke:

—Iki de neti nna si dala attu benne ra tsitsiru lebie attichula neti. Neti labí elha ralhaa iyettaa idhasia lo ka gwaracha geeha. <sup>8</sup> Gwalí galá neti tti rugadia le inda, suna indaba rixúti, ttaka benneha nna ugadie le Espíritu ge Tata Do Yebáha.

*Jesús-ni radie inda*

*(Mt. 3:13-17; Lc. 3:21-22)*

<sup>9</sup> Lhe'e ka sáha-gaba udá Jesús-ni lhe'esi Nazaret, re nuha daka Galilea. Nianna bisine nna begadi Juan-nie inda lhe'e yoo Jordán-ni. <sup>10</sup> Tti lo reria Jesús-ni lhe'e indaha, nianna bilánie biyali yebáha nna Espíritu ge Tata Do Yebáha attiba ttu becha ugwadie betedhoe ikie. <sup>11</sup> Nianna tti biyien tsi'i ttu benne unnebie yebáha, ree bie:

—Lu ankalu Xi'inia rakati gelu; lu ankalu benne ru'u lasia.

*Nu xxegwiha benna dhi yiena Jesús-ni*

*(Mt. 4:1-11; Lc. 4:1-13)*

<sup>12</sup> Nianna che tteba Espíritu ge Tata Do Yebáha Jesús-ni daka lo yu bisiha, ata lanú benne se'e. <sup>13</sup> Niha ugwekie chua (40) ubisa ata reki ka nimala ixxi. Niha-gaba ben nu xxegwiha dhi yiene nna ka anjeliha-ba bete náke lenbie.

*Jesús-ni uduloe rigixxi'abie ka tisa ge Tata Do Yebáha*

*(Mt. 4:12-17; Lc. 4:14-15)*

<sup>14</sup> Iki de chi utixxakana Juan-ni lisiyya, Jesús-ni nna deyye daka Galilea rigixxi'anie ka benne ka

tisa tse, delába rigixxi'e gasina ki akake benne innabia Tata Do Yebáha ke. <sup>15</sup> Nianna ree ka benneha:

—Chiba gwa dona sá ga'anani Tata Do Yebáha lhe chigaba dabigana innabie. De nuha nna gwalodúna le nna gwaltsia lele ge ka tisa geeha.

*Jesús-ni raxie ttapa ka benne kini udhetinie ke (Mt. 4:18-22; Lc. 5:1-11)*

<sup>16</sup> Tti ute Jesús-ni ro'o indatoo ge Galilea-ni, niha bilánie Simón-ni lenna betsini Andrés-ni yu'ukana rudelhakana yexxa ge ka belhaha lhe'e indaha, kumu ankakana benne rudaxxu belha.

<sup>17</sup> Jesús-ni nna ree kana:

—Gwaltá gwetenalha neti. Neti nna unia kini akale ka nu gaxile ka benne ki udaxxuke neda ge Tata Do Yebáha.

<sup>18</sup> Looraha tteba nna bese'e bixxibakana ka yexxa gekaniha nna diakana danalhakane.

<sup>19</sup> A lattiruba bededábie nna bedelánie Jacobo-ni lenna betsini Juan-ni. Ka nuha ankakana xi'in Zebedeo. Se'ekana lhe'e barcu gekaniha reyoinkana ka yexxa ka nu rudaxxu lenkana belhaha. <sup>20</sup> Nianna uxi ttebe kana. Lakana nna bedhá bixxiba ikikani tata gekaniha lo barcuha lenie ka nu ren sina gekaniha, nianna dia ttebakana danalhakana Jesús-ni.

*Jesús-ni bebeabie ttu espíritu satsa yu'u lati ttu nubiyú*

*(Lc. 4:31-37)*

<sup>21</sup> Tti bisin Jesús-ni lenie ka benne rudhetinieha lhe'esi Capernaum-ni, la sá tti reyaka le ka benne Israel-ni, uta'a ttebe lhe'e yo'o ata rudhetike ka tisa ge Tata Do Yebáha nna uduloe

rule'enie ka benne se'e niha. <sup>22</sup> Ka benneha nna rebanabakanie ge nu rule'enie keha kumu rinnebie ttiba rinne ttu uxtisi rapa lo neda, labí tti rinne ka nu rule'ekinna ka benne nu ra lo bia bennabi bodha'an Moisés-ni. <sup>23</sup> Lhe'e yo'o ata rudhetike ka tisaha, niha re ttu nubiyú yu'u latini ttu espíritu satsa. <sup>24</sup> Nubiyúha nna unnena idisa, rana:

—¡Begwelha ri'itu! ¡Bittu etega'a gelu len ri'itu, lu Jesús ge Nazaret! ¿Si dalu gwetse'e loo ri'itu? Neti gwankabiabati lu. ¡Lu ankalu benne chi ulesi Tata Do Yebáha!

<sup>25</sup> Jesús-ni nna bedhaka dise espíritu satsaha, ree nuha:

—¡Bedhea ro'olu nna beria lati nubiyú-ni!

<sup>26</sup> Espíritu satsaha nna bekubi xxattana nubiyúha nna ribesi'a layabana beriana latini. <sup>27</sup> Iyába ka benne se'e niha bebanabakanie nna rinnaba tisa luesike, ráke:

—¿Bíunni raka? ¡Nubiyú du-ni rula'ana attu tisa kubi! ¡Xxeniba ra leni nna axtaba ka espíritu satsa-na rudokana tisa ge nu rana!

<sup>28</sup> Nianna ttu nnelaba ugwadhi tisa ge Jesús-ni nna ka benne se'e itúba daka Galilea-ni rinneke ge nu runieha.

*Jesús-ni beyonie ixe ka benne rani*  
(Mt. 8:14-17; Lc. 4:38-41)

<sup>29</sup> Atti beriake lhe'e yo'o ata rudheti ka benne Israel-ni ka tisa ge Tata Do Yebáha, Jesús-ni lenie Jacobo-ni lhe Juan-ni lhe dia ttebake lisi Simón-ni lhe Andrés-ni lhe. <sup>30</sup> Nan ge nuila ge Simón-ni teba benneha yu'u xxatte xilhaa. Nianna utixxi'akinna Jesús-ni ge benneha. <sup>31</sup> Jesús-ni

nna ubiga ttebe bedaxxue ná benneha nna ulhidhe bie. Looraha tteba nna beria xilháha lati benneha nna udulo ttebe benie nu utoke.

<sup>32</sup> Atti chi ugwadi tatubisa-na lo'eyya-na, tti chi daa ratti loha, la'ania nna iyába ka benne yu'u isagwe latike lhe ka benne yu'u latike espíritu xxegwi uchekana ke ata du Jesús-ni.

<sup>33</sup> Nianna itúba yiesiha bitupa ro'o yo'o ata dueha. <sup>34</sup> Jesús-ni nna beyonie ixeba ka benne rani yu'u latike iyá looba isagwe lhe bebeabie ixeba ka espíritu xxegwi yu'u lati ka benne lhe. Labí begwelhe inne ka espírituha kumu yúbakana nú anke.

*Jesús-ni rigixxi'abie ka tisa ge Tata Do Yebáha daka Galilea*

*(Lc. 4:42-44)*

<sup>35</sup> Dila tteba ugwadha Jesús-ni. Sa rula'aruba chulhaha birie die ro'esiha nna bisine ttu latti ata lanú benne se'e. Niha ulhapie tisa len Tata Do Yebáha. <sup>36</sup> Simón-ni lhe ka benne se'e lennaha, diake satilake bie. <sup>37</sup> Tti gwaxxakake benneha nna ráke bie:

—Iyába ka benne chi rekike ugila lu.

<sup>38</sup> Lee nna ree ke:

—Tsiari'i lhe'e adí ka yiesi se'e gaxxaba nii kini lhe'e ka nuná kixxi'agabaa ka tisa ge Tata Do Yebáha, kumu de nuha-la daya.

<sup>39</sup> Itúba Galilea-ni reki Jesús-ni rigixxi'e ka tisa ge Tata Do Yebáha lhe'e ka yo'o ata rudheti ka benne se'e niha ka tisa geeha lhe anágaba nna rebeagabe ka espíritu xxegwi yu'u lati ka benneha lhe.

*Jesús-ni beyonie ttu benne raka latie yiesu nu tee láni lepra*

*(Mt. 8:1-4; Lc. 5:12-16)*

<sup>40</sup> Ttu benne biyú raka latie yiesu nu tee láni lepra, bisine ata du Jesús-ni nna bedú xibie arlo benneha nna ree bie:

—Tata to, ganna lu aka lelu, gwadaabalu eyoinlu neti.

<sup>41</sup> Jesús-ni nna gwatuaba lebie benneha nna tti belhí nábie utane lati benneha nna ree bie:

—Gwaka galá lasia. ¡Nnanna, chinka beyaka!

<sup>42</sup> Looraha tteba nna betúa yiesuha lati benneha nna beyaka ttebe. <sup>43</sup> Nianna bedhelha tteba Jesús-nie deyye nna bodha'an tsitsie, ree benneha:

<sup>44</sup> —Biyú gelu. Anuttu nu kixxi'enlu. Sun tteba nna ugía gwatso du arlo bixxudiha nna uche úna nu daa lolu utelu ge Tata Do Yebáha de chi beyarilu. Beni attiba ra lo bia bennabi bodha'an Moisés-ni. Aníha kini uyú lo ka benne deki chiba betúa isagwe-na latilu.

<sup>45</sup> Ttaka benne biyúha nna adíla benie. Tti berie niha deyye nna iyába ka benne utixxi'anie ge nu chi ben Jesús-ni. De nuha nna birua uka ga'a Jesús-ni la saa lhe'e ka yiesi se'e niha. Ka ro'esiha-liba ridúe ata lanú benne se'e. Ata dueliba risina ka benne daa lhe'e iyába ka yiesiha.

## 2

*Jesús-ni beyonie ttu benne daa yatti latie*

*(Mt. 9:1-8; Lc. 5:17-26)*

<sup>1</sup> Iki de chi ute ttu chupa ubisaha nna bedesin Jesús-ni lhe'esi Capernaum-ni attu libe. Sun tteba bina ka benne deki chi doe lhe'e yo'oha, <sup>2</sup> nianna bitupa tteba ixeruke. Laxkala axtaba ro'o puertaha birua rakanike. Jesús-ni nna rigixxi'anie ke ka tisa ge Tata Do Yebáha. <sup>3</sup> Nianna tti bisin ttapa ka benne biyú nujake ttu benne daa yatti latie ata dueha. <sup>4</sup> Ttaka kumu de tupa xxatta galá benne ro'o yo'oha, laxkala bi uka ga'ake len benne raniha kini isinke ata du Jesús-ni. Nianna tti ugwapike iki yo'oha nna utuake ttu chupa ka texa ki udo belea ttu lhixxaba ata dueha. Aníha-ruba kini uka ulhidake benne raniha xue lo ttu breta. <sup>5</sup> Tti bilani Jesús-ni gwa riaba le ka benneha deki gwadaabe eyonie benne daa yatti latieha, nianna tti ree benneha:

—Xi'ini to kia, nnanna chiba bixú elha xen lasi ge ka tulha gelu-na.

<sup>6</sup> Niha-gaba se'e ttu chupa ka nu rule'ekinna ka benne nu ra lo bia bennabi bodha'an Moisés-ni. Ka nuha nna belaba lhi'u lekani, rakakinna: <sup>7</sup> “¿Beaka rinne nu du-ni aní? Rilhida gaabana Tata Do Yebáha tti rinnena aná. Lanú nu aka geni dhina elha xen lasi ge ka tulha ruin ka benne, sunruba Tata Do Yebáha gwaka gebie dhie elha xen lasi gekani.”

<sup>8</sup> Ttaka Jesús-ni nna ute da ttebanie deki rulaba lhi'u lekani aníha. Nianna tti unnaba tise kana, ree:

—Lebi'i nna, ¿beaka rulaba lhi'u lele aná?

<sup>9</sup> Gwalinnáruga, ¿bí nuha nu sattiru gari'i benne daa yatti latie-ni? ¿Si gari'e: “Chiba bixú elha xen lasi ge ka tulha gelu-na” ak? o ¿gari'e:

“Beyadha nna bodaxxu nu xualu loin-na nna bedá”? <sup>10</sup> Nnannaruga ula'ania le ki uyú lole deki neti benne daya yebáha, yiesi lo yu-ni gwa teeba lo neda kia ki dhia elha xen lasi ge ka tulha ruin ka benne.

Nianna tti ra Jesús-ni benne daa yatti latieha:

<sup>11</sup> —Lu rulisaa. Beyadha nna bodaxxu nu xualu loin-na nna beyya lisilu.

<sup>12</sup> Benne daa yatti latieha nna beyadha ttebe nna bodaxxue breta xue loniha nna berie lo iyába ka nu se'e niha. Ka nuha nna iyábakana bebanakinna, rákana:

—¡Xxeniba ra le Tata Do Yebáha! ¡Niru tsa labí chi bilenri'i aka luesi nu uka-ni!

*Jesús-ni raxie Leví-ni kini sanalhane*  
(Mt. 9:9-13; Lc. 5:27-32)

<sup>13</sup> Iki de nuha nna bederia Jesús-ni dedheyye ro'o indatooha nna iyába ka benne risinke ata dueha. Labie nna rule'enie ke ka tisa ge Tata Do Yebáha. <sup>14</sup> Tti utebie die, nianna bilánie Levíxi'in biyú Alfeo-ni dona ata rukixakana belhiu nu daa lo ka benne rigixake ge Roma. Nianna tti ree na:

—Utá betenalha neti.

Nianna udú lii ttebana nna gwanalhane.

<sup>15</sup> Uka nuha, tti chi do Jesús-ni go yetta lhe'e lisi Leví-ni, ixeba ka gwexixa lhe adíru ka nu tekinna lákani deki anakana ka nu ruin satsa se'egabakana lenie go yetta. Anágaba nna se'egaba ka benne rudhetinieha. Kumu ixeba chi raka ka benne danalhake bieha. <sup>16</sup> Ka nu rule'ekinna ka benne nu ra lo bia bennabi bodha'an Moisés-ni, delába ka nu anakana fariseo, tti bilákinna dobie go yetta len ka



gwekixaha lhe ka nu ruin satsaha lhe, nianna tti rákana ka benne rudhetinieha:

—¿Beakala maestru gele-na nna robe yetta len ka gwekixa-na lhe len ka nu ruin satsa-na lhe?

<sup>17</sup> Tti biyienin Jesús-ni nu rákana, nianna tti ree kana:

—Ka nu abittu rani-na, ka nuná labí riyasakin nuná nu eyoinna kana, sinuki ka nu rani-nala nuná riyasakinna nu eyoinna kana. Neti laa dagaa raxia ka nu ruin nu dika ixú, sinuki dalaa kini raxia ka nu ruin satsa.

*Jesús-ni rigixxi'abie nuka utte ubina lhe'e ka benne*

*(Mt. 9:14-17; Lc. 5:33-39)*

<sup>18</sup> Atti bilani ka benne deki ka nu rudhetini Juan benne rugadi indaha lhe ka nu rudhetini ka fariseo-ni lhe, ka nuha rutteba ubina lhe'ekani, labí rokana yetta, nianna tti ugía ka benneha nna gweasike Jesús-ni:

—¿Beakala ka nu rudhetini Juan-ni lhe ka nu rudhetini ka fariseo-ni lhe rutteba ubina lhe'e ka nuná, ka nu rudhetinlu-na nna labí rutte ubina lhe'e ka nuná?

<sup>19</sup> Nianna bekabi Jesús-ni, ree kana:

—¿Laaba ganna labí dika utte ubina lhe'e ka benne biyaxi kini tse'eke dha'aha, laka sa du nu kwiti rutsá náníha lenke? Neti ria: laka sa du nu kwitiha lenke labí dika utte ubina lhe'eke.

<sup>20</sup> Ttaka ganna chi bisia sá tti itua nu kwitiha, anúruna dho lenke, la'anialigaba nna chi utte ubina lhe'eke.

<sup>21</sup> 'Anágaba lanú ttu benne do rotábie ttu ro'o lari kubi ro'o xo yaxxu geeha. Kumu ganna aníha unie, la'ania nna iyalhiba ro'o lari

yaxxuha, nianna adíla satsa ireda xoeha, <sup>22</sup> lhe nigaba lanú ttu benne do riga'abie vinu kubi lhe'e ka yieti yaxxu. Kumu ganna aníha unie, vinu kubiha, ganna chi úlana, la'ania nna itsúba nuha yietiha nna ilaliba vinuha lhe tse'e loogaba yietiha lhe. Laxkala vinu kubiha teeki ita'a nuha lhe'e ka yieti kubi.

*Jesús-ni anke xxana ka sá reyaka leri'i*

*(Mt. 12:1-8; Lc. 6:1-5)*

<sup>23</sup> La sá tti reyaka le ka benne Israel-ni, la'ania ute Jesús-ni lhe'e ka xuxtila se'e niha len ka benne rudhetinieha. Ka benneha nna uduloke richekuke iki ka xuxtilaha. <sup>24</sup> Ka fariseo-ni nna rákane:

—¡Biyúruuga! ¿Beaka ruin ka nu rudhetinlu-na nu abittu ga'anna uinri'i lhe'e ka sá atti reyaka leri'i?

<sup>25</sup> Lee nna bekabie, ree kana:

—¿Si ni tsa abittu chi belabale lo yetsi ge Tata Do Yebáha ata rigixxi'a bí ben David-ni ttu libeha? Yule benneha itupa lenie ka benne ugweki lenie la'ania, tti bituinkeha nna biyasakanie nu goke. <sup>26</sup> La'ania uta'a David-ni lhe'e yotu ge Tata Do Yebáha atti anka Abiatar-ni bixxudi xeni. Nianna utoe ka yettaxtila ka nu chi riesike ankake sun tteba ge Tata Do Yebáha, anágaba nna begwegabe ka benne se'e lenie la'ania ki utoke benneha, delába utoke ka yettaxtila ka nu labí ga'anna go attu benne subi, sunruba ka bixxudiha gwaka gokana benneha.

<sup>27</sup> Jesús-ni nna rágabe kana:

—Ka sá tti reyaka leri'i-na ukakana ki ri'i ixuinri'i kana, laa uligari'i kini nu innála ka sá-na

uinri'i. <sup>28</sup> De nuha nna neti benne daya yebáha, netiba ankaa xxana ka sá reyaka leri'i. De nuha nna gwa teeba lo neda kia innía bixa dika uinri'i lhe'e ka sá reyaka leri'i.

### 3

*Jesús-ni beyonie nubiyú daa yatti nániha*  
(Mt. 12:9-14; Lc. 6:6-11)

<sup>1</sup> Jesús-ni uta'abie attu libe lhe'e yo'o ata rudheti ka benne Israel-ni ka tisa ge Tata Do Yebáha. Niha re ttu benne biyú daa yatti ttu lha'a nábie. <sup>2</sup> Ka fariseo-ni nna rulhatsibakana ge Jesús-ni ganna gweyonie benneha la sá tti reyaka lekaniha, kini anáchu nna tee ro'okani bixa usiakana ikie. <sup>3</sup> Nianna tti ra Jesús-ni benne daa yatti neeha:

—Udú lii nna utá udú lagwi-ni.

<sup>4</sup> Nianna tti unnaba tise kana, ree kana:

—¿Bí ga'anna uinri'i lhe'e ka sá tti reyaka leri'i? ¿Si uinri'i latsiru ak? ¿O uinri'i nu satsa ak? ¿Si odilári'i ttu benne? ¿O ugwelhari'i gattie ak?

Ttaka lakana siiba ukakana, labí bekabikana gebie. <sup>5</sup> Jesús-ni nna risa'abanie rulannie lo ka nu se'e abi'iba kwe'eeha nna si'iba bedúna lebie kumu de ruin tsitsi lastokani, labí ria lekani. Nianna tti ree benne biyúha:

—Belhí nálu.

Benneha nna belhí tteba nábie nna beyaka tteba nuha. <sup>6</sup> Tti beria ka fariseo-ni lhe'e yo'oha nna unne tteba lenkana ka nu tákana Herodes-ni, kumu regila lekani gaxasina uinkana kini uttikana Jesús-ni.

*Ixe juisiru ka benne danalhake Jesús-ni*

<sup>7</sup> Jesús-ni nna beru'une deyye len ka benne rudhetinieha daka ro'o indatooha nna ixe juisiru ka benne ge Galilea-ni danalhake bie. <sup>8</sup> Anágaba ka benne daa itúba daka Judea-ni lhe Jerusalén-ni lhe ka benne daa daka Idumea lhe ka benne se'e attu ladu yoo Jordán-ni lhe. Anágaba nna dágaba ka benne se'e abi'iba kwe'e yiesi Tiro lhe Sidón lhe. Ixe juisiru ka benneha, tti biyienkanie iyá nu runieha nna danalhake bie. <sup>9</sup> De nuha nna ra Jesús-ni ka benne rudhetinieha udú tseke ttu barcu kini tsapie loni ki abittu ukí ya'a ka benne bie. <sup>10</sup> Kumu de ixe galá ka benne chi beyonie, de nuha nna iyába ka benne raka latike ttu bixa, xua-niba iki luesike diake kwe'ebie kumu de raka leke sattanke latie. <sup>11</sup> Ka espíritu satsa yu'u lati ka benne, atti rilákin nuha Jesús-ni nna ribesi'abakana rudú xibikani arloe, rákane:

—¡Lu ankalu Xi'in Tata Do Yebáha!

<sup>12</sup> Ttaka labie nna bedhaka dise ka espíritu satsaha kini abittu kixxi'akana nuxa anke.

*Jesús-ni bekwebie tsi'inu (12) ka benne kini tsiake kixxi'ake ka tisa geeha*

*(Mt. 10:1-4; Lc. 6:12-16)*

<sup>13</sup> Iki de nuha nna ugwapi Jesús-ni iki i'yaha, nianna uxie ka benne uka lebie gaxie. Ka benneha nna ubigake kwe'ebie. <sup>14</sup> Nianna tti bekwebie tsi'inuke (12) kini tseki lenke bie lhe kini idhelhe ke tsiake kixxi'ake ka tisa ge Tata Do Yebáha. <sup>15</sup> Anágaba nna begwegabe ka benneha lo neda ki eyoinke ka benne rani lhe ki ebeake ka espíritu xxegwi yu'u lati ka benneha lhe. <sup>16</sup> Nii dia lá tsi'inu (12) ka benne bekweeha,

delába, Simón benne utixxagabe lábie Pedro, <sup>17</sup> lhe Jacobo-ni lenie betsie Juan-ni. Ka benne-ni ankake xi'in Zebedeo. Lagabake nuha utixxe láke Boanerges. ("Boanerges" dienna innána ka nu ru'u be idisa.) <sup>18</sup> Bekwegabe Andrés, lhe Felipe, lhe Bartolomé, lhe Mateo, lhe Tomás, lhe Jacobo xi'in Alfeo, lhe anágaba Tadeo, lhe Simón benne rágabakana Zelote, <sup>19</sup> lhe bekwegabe Judas Iscariote nu betene lasi ná ka nu bettikaneha.

*Rusiakana iki Jesús-ni deki rixúnie Beelzebú-ni ki rebeabie ka espíritu xwegwi yu'u lati ka benne (Mt. 12:22-32; Lc. 11:14-23; 12:10)*

<sup>20</sup> Iki de nuha nna beyeki Jesús-ni besine lhe'e yo'oha, nianna bedetupa tteba ixeru ka benne. Laxkala niba yetta laa uka go lenie ka benne chi bekwebieha. <sup>21</sup> Tti bina ka benne raka luesieha ge nu runieha, nianna ugiake kini saxíke bie kumu ráke rakaba ikie.

<sup>22</sup> Ttaka ka nu rule'ekinna ka benne nu ra lo bia bennabi bodha'an Moisés-ni, delába ka nu daa Jerusalén-ni, ka nuha nna rákana deki Beelzebú nu anka xxana ka espíritu xwegwiha-ba yu'u lati Jesús-ni, laxkala Beelzebú-niba rixuin Jesús-ni kini rebeabie ka espíritu xwegwi yu'u lati ka benne.

<sup>23</sup> Nianna tti uxi Jesús-ni ka nu rinne aníha nna utixxi'anie kana ttu tisa. Aníha benie kini utte dákana bí diani nu raka lebie kixxi'anie kana, nianna tti ree:

—Laa gwakaga ge nu xwegwiha ebeana ka luesi xwegwi-niha. <sup>24</sup> Ttibanka ganna ttixka lhe'e ttu yiesi se'e la'a ka benne geni de ritilha len luesike, la'ania nna labíru uchía yiesiha lo

nu ratenaha <sup>25</sup> lhe ganna ttixka ka benne se'e lhe'e ttu yo'o se'e la'ake de ritilha len luesike, la'ania nna labíru aka tse'e ka benneha tutupa.

<sup>26</sup> Anágaba nu xzegwiha, ganna itilha lenna ka luesi xzegwi-niha, la'ania nna labíru aka dhona tutupa len ka nuha. Ganna aníha uinna, la'ania nna chiba bisia sá ge nuha lhuxana.

<sup>27</sup> 'Anágaba lhe lanú nu aka geni ga'ana lhe'e yo'o ge ttu nubiyú ankana tipa kini lhanana nu se'e lhe'e yo'o ge nuha, ganna ttixka abíba udaxxuna nubiyú anka tipaha lade'a tte nna uxxikana nuha. Kumu gannaliba chi xikinna nubiyúha, la'anialiba nna gwaka geni lhanana nu se'e lhe'e lisi nuha.

<sup>28</sup> 'Netiru ria: gwadíba Tata Do Yebáha elha xen lasi ge iyába nu satsa uni ka benne lhe ge iyába nu satsa inneke lhe, <sup>29</sup> ttaka ganna ttu benne inne satse ge Espíritu ge Tata Do Yebáha, benneha ttu tsala labí ixú elha xen lasi gebie, sinuki ttu dia liiba uja benneha yua ge nu inneeha.

<sup>30</sup> Aníha ra Jesús-ni kumu ka nu rule'ekinna ka benne nu ra lo bia bennabiha rálakana deki espíritu satsaba yu'u latie.

*Nan ge Jesús-ni lhe ka betsieha lhe raka leke inne lenke bie*

*(Mt. 12:46-50; Lc. 8:19-21)*

<sup>31</sup> Nianna tti bisin nan ge Jesús-ni lhe ka betsieha ro'o yo'o ata do Jesús-ni rule'enie ka benne. Ro'o yo'oha-liba use'e ka nan geeha nna udhelhake kini belisakana Jesús-ni. <sup>32</sup> Ka benne se'e abi'iba kwe'eeha nna unneke, ráke bie:

—Ne nan geluha lhe ka betsiluha lhe ka danluha lhe, se'eke ro'o yo'o-ni regilake lu.

<sup>33</sup> Lee nna bekabie ree:

—¿Nú rale deki anka nan kia lhe betsia lhe?

<sup>34</sup> Nianna tti belannie lo ka benne se'e abi'iba kwe'eeha nna tti ree:

—Gwaluyúrua, ka benne se'e-nila nuní ankake nan kia lhe betsia lhe. <sup>35</sup> Kumu nuxaba benne ganna runie nu ru'u le Tata Do Yebáha, benneha nuha anke betsia lhe danaa lhe nan kia lhe.

## 4

*Jesús-ni rigixxi'abie ge ttu benne dia gwedelha xuxtila*

*(Mt. 13:1-23; Lc. 8:4-15)*

<sup>1</sup> Jesús-ni bededuloe attu libe rodole'enie ka benne ka tisa ge Tata Do Yebáha ro'o indatooha nna ixé juisiru ka benne bedetupake abi'iba kwe'ebie. Laxkala teeki ugwapie lo ttu barcu daa lo indaha nna udoe lhe'e nuha. Ka benne tupaha nna ro'o indaha-liba se'eke rudo nagake gebie. <sup>2</sup> Ixeba nu rigixxi'anie ke. Aníha benie ki utte dáke bí diani nu raka lebie kixxi'anie keha, nianna tti ree ke:

<sup>3</sup> —¡Gwaludoruga nagale! Ttu nubiyú ruin sina biriana diana gwedelha xuxtila. <sup>4</sup> Tti dana gwedelha xuaha nna adí benneha utse ro'o nedaha, nianna tti biginni ka binniha, nna bediga ttebakana benneha. <sup>5</sup> Attu chupe nna utse lo íyya atta'a ata labí gwadilo yu do. Benneha nna gwa be'eyu ttebe kumu de labí rea xua yuha niha. <sup>6</sup> Ttaka tti biria tatubisaha nna bettebe benneha kumu de labí lhi'u dia lhue, de nuha

nna ubisi tteba benneha. <sup>7</sup> Attu chupe nna utse lhe'e yietsiha, ttaka yietsiha biyelhabana nna belhiubinna benneha. Laxkala labí xua bete benneha. <sup>8</sup> Ttaka adí benneha nna gwa ubinnibe ata do yu tse. Benneha nna yalhá lhe'e be'eyue lhe biyelhe lhe. Laxkala tseba betebie lena. De rerua (30) lhe de gayuna (60) lhe de gayua (100) tteba xua bekudhi iki ttu ttu ka xuxtilaha.

<sup>9</sup> Nianna tti ra Jesús-ni ke:

—¡Ata sia nagale, gwaludo nagale ganna gwankale nu dika iyienini!

<sup>10</sup> Atti chi beya'an Jesús-ni sun ttúbe lenie ka benne tsi'inu rudhetinieha (12) lhe attu chupa ka benne se'e gaxxaba ata dueha lhe, nianna tti unnaba tisake bie, ráke bie:

—¿Bí diani nu ralu tti utixxi'alu ge benne dia gwedelha xuxtilaha?

<sup>11</sup> Labie nna ree ke:

—Lebí'iligaba nna gwagixxi'abin Tata Do Yebáha le nu labí chi yu adí ka benne, delába gwa ruinba Tata Do Yebáha kini tte denle gasina innabie ka benne. Ttaka ka benne abittu chi rinnabie, neti bixxi kwe'eba rinnea tti rigixxi'ania ke nuni,

<sup>12</sup> kini meskiba gwa rulannike nna labí ilákanie, lhe meskiba gwa rudo nagake nna labí tte dákanie;

aníha kini ka eyekike nna odaxxuke neda ge Tata Do Yebáha,

lee nna dhie elha xen lasi geke.

<sup>13</sup> Nianna tti ree ka benneha:

—¿Si lagwa gwa rite denle bí diani nu utixxi'aya ge benne dia gwedelha xuxtilaha? ¿Galasina tte denle adíru ka nu kixxi'ania le



ganna? <sup>14</sup> Benne rudelha xuxtilaha anke benne rigixxi'e ka tisa ge Tata Do Yebáha. <sup>15</sup> Ka xua utsa kwe'e nedaha nna ankake ka benne biyienkanie ka tisaha. Ttaka daa tteba nu xxegwiha nna rebea ttebana ka tisaha lhe'e lastoke; delába ru-inna kini rexulhakanie ka tisa chi biyienkanieha. <sup>16</sup> Adíke nna ankake ttiba ka xua utsa lo íyya atta'aha. Tti biyienkanie ka tisaha nna ittaba bedúna leke nna bedaxxu ttebake ka tisaha. <sup>17</sup> Ttaka kumu de labí chi begwe lhu ka tisaha lhe'e lastoke, de nuha nna sattiruba ria leke ge Tata Do Yebáha, nna atti chi rateke ttu bixa elha disa o lhe atti chi ridú nookana ke de ria leke ka tisaha, la'ania nna reyadi gaa ttebake. <sup>18</sup> Alhe ka benneha nna ankake attiba ka xua utsa lhe'e yietsiha. Gwa riyienbakanie ka tisaha, <sup>19</sup> ttaka ka elhaxchacha iki geke tee yiesi lo yu-ni lhe de rudo xxattana leke gatta geke, lhe anágaba lhe de ru'u xxatta leke ge adíru nu tee yiesi lo yu-ni, nuha-la rudoruna leke ruinke, de nuha nna richúbana lo ka tisaha. La'ania nna labí ruin ka tisaha sina lhe'e lastoke kini uin tseke. <sup>20</sup> Adíke nna ankake attiba ka xua ubinni lo yu tseha. Ka benneha nuha riyienkanie ka tisaha nna bedaxxuke ka tisaha. Laxkala gwa ruinba ka tisaha sina lhe'e lastoke. Ka benneha nuha ankake attiba ka xuxtila bete de rerua (30) lhe de gayuna (60) lhe de gayua (100) lhe.

*Jesús-ni rabie: "Labí ttu bixa raka sigá abittu una benne geni"*

*(Lc. 8:16-18)*

<sup>21</sup> Rágaba Jesús-ni kana:

—Ttu gi rudenna ki ilenri'i, laa taxxígari'i nuha kini uttudhiri'i ttu almoti ikini o ukatsiri'i

na xan ata rattari'iha. ¿Laaba ganna teeki udori'i nuha gwetsá ki udenna geri'i? <sup>22</sup> Anágaba labí ttu bixa tee gatsi nu abittu ilenri'i lhe labí ttu bixa raka sigá abittu iriana la loo. <sup>23</sup> ¡Ata sia nagale, gwaludo nagale ganna gwankale nu dika iyienini!

<sup>24</sup> Lhe rágabe kana:

—Gwaludo tsitsi nagale gasina rutte dale nu rinnea-ni, kumu ttu luesi nu rurixxibiale rugwele ka benne, ttu luesi nuha-gaba orixxibia Tata Do Yebáha otebie gele. Benneha nna adírula xxeni otebie gele. <sup>25</sup> Kumu nu gwa tee geniha, gwadí chiettirula nuha nna nu abittu tee geniha nna axtala nu ttu latti chi tee geniha etua.

*Jesús-ni rigixxi'abie gasina riyelha ka xuxtila*

<sup>26</sup> Jesús-ni rágabe:

—Tata Do Yebáha atti rinnabie ka benne, elha rinnabia geeha raxxína na len nu ruín ttu benne dia gwedelha xuxtila. <sup>27</sup> Benneha rattabe ra'adhie rela nna rani nna radhabe. Xua bedelheha nna rela resába dia benneha re'eyue lhe riyelhe lhe. Benne bedelha xuaha nna labí yue gasina raka, <sup>28</sup> kumu titúba yuha re'eyu lena loni. Lade'axa riria lhaga to ge xuaha, nianna tti ribea ikie. Iki deliba nuha nna tti chi ru'u lhe'ebie. <sup>29</sup> Ganna chi bigatsi xuxtilaha, la'ania nna udaxxu tteba iyyarsela ge benne bedelha xuxtilaha kini egitse benneha kumu chiba bisia sá exú benneha. Aníha-ba raka atti rinnabia Tata Do Yebáha ka benne.

*Jesús-ni rigixxi'abie ge ttu besi ge kuana mux-tasa*

(Mt. 13:31-35; Lc. 13:18-19)

<sup>30</sup> Jesús-ni rágabe:

—¿Gasina rule'e tti rinnabia Tata Do Yebáha ka benne? ¿Bí nuha rula'a tti rula'a elha rinnabia geeha? <sup>31</sup> Tata Do Yebáha atti rinnabie ka benne, elha rinnabia geeha ankana ttiba ttu besi ge kuana muxtasa riyada lo yu. Besiha-la nuha ankana nuxka'a toru delo iyá ka besi re'eyu yiesi lo yu-ni. <sup>32</sup> Ttaka iki de chi riyada besiha nna gwa re'eyubana. Nianna rixenba kuanaha nna xxenirula rakana attichula adí ka kuana ya'a. Xxeniba raka ka náni, laxkala axtaba ka binni-na ratsiakana xula geni.

<sup>33</sup> Ixeba luesi ka tisa-ni bixúni Jesús-ni ki unnebie. Aníha benie kini tte dani ka benne nu raka lebie kixxi'anie ke. Utixxi'abanie ke nu dika dhaake tte dákanie. <sup>34</sup> Labí lhixxa rá utixxi'anie ke sinuki utixxi'abe nu raxxibana len nu raka lebie ule'enie ke. Ttaka ka benne rudhetinieha, tti due sun len ka benneha-ba nna gwa rigixxi'abanie ke bí diani iyá tte nu reeha.

*Jesús-ni benie kini bebe sii lo indatooha*  
(Mt. 8:23-27; Lc. 8:22-25)

<sup>35</sup> La sáha-gaba nuha, atti chi dia ralhaha, nianna ra Jesús-ni ka benne rudhetinieha:

—Eteri'i lo indatoo-ni kini eriari'i ro'oni daka nu reha.

<sup>36</sup> Niha-ba boka'anke ka benne ixe danalhaha nna aníha-ba dedo Jesús-ni lo barcuha, dechekane. Danalhagaba adíru ka barcu. <sup>37</sup> Ttaka ttiruba ttu nnelaba bisia ttu be idí nna bedhú liina lo indatooha nna uta'ana lhe'e barcuha. Laxkala chi tteba ruin nuha xxudina lhi'u lhe'e indaha. <sup>38</sup> Ttaka Jesús-ni nna tebe

te'adhie daka xan barcuha kuni ikie ttu lari. Ka benne rudhetinieha nna bodibenke bie, ráke bie:

—¡Maestru! ¿Si bi gwa retabinlu ka tsapiri'i inda-ni nna gattiri'i?

<sup>39</sup> Nianna tti ugwadhe bedhaka dise beha nna ree indatooha:

—¡Siiba beyaka!

La'ania nna udú sii tteba beha nna tsaba bebe sii lo indaha. <sup>40</sup> Nianna tti ra Jesús-ni ke:

—¿Beaka rasinle? ¿Beaka a ruxxen lele kia?

<sup>41</sup> Ttaka lake yalhá usikanie, nianna tti ra luesike:

—¿Nú anka benne-ni nna axtaba be-na lhe indatoo-na lhe rudokana tisa gebie?

## 5

*Jesús-ni bebebie espíritu satsa yu'u lati ttu nubiyú*

*(Mt. 8:28-34; Lc. 8:26-39)*

<sup>1</sup> Beteba Jesús-ni lenie ka benne rudhetinieha lo indatooha nna bisinke daka lo yu ge ka benne Gadara. <sup>2</sup> Tti ugwadie lo barcuha nna biria tteba ttu nubiyú yu'u ttu espíritu satsa latini, biriana ata se'e ka baa ge ka benne yattiha, nianna tti betetsána Jesús-ni. <sup>3</sup> Lhe'e ka baaha-ba reya'an nubiyúha. Nurula ridaana uxxikana na, niruba len cadena. <sup>4</sup> Ixe lidú chi bexxikake ka ni'a náni len cadena, ttaka richú ttebana ka cadenaha nna niruba ttu benne a ridee loni. <sup>5</sup> Rela resába rekina iki ka i'yaha lhe lagwi ge ka baaha ribesi'ana lhe ruingaba gwe latini len ka íyya lhe. <sup>6</sup> Idittuli daa Jesús-ni bilenne, nianna

biresu ttebana gwatsáne nna bedú xibini arloe.

<sup>7</sup> Nianna tti unnena idisa, rane:

—¡Bittu etega'a gelu len neti, Jesús Xi'in Tata Do Yebaa benne ra xxeni leeha! ¡Rinnabaa lenlu, benchi lo ni'a ge Tata Do Yebáha bittu ugwelu neti elha disa!

<sup>8</sup> Aníha rana kumu Jesús-ni chi unnebie, ree:

—¡Espíritu satsa, beria lati nubiyú-ni!

<sup>9</sup> Nianna tti unnaba tise na nna ree na:

—¿Bí lálu?

Lana nna bekabina, rana:

—Legión-ba lá neti, kumu ixé ri'itu raka.

<sup>10</sup> Nianna unnaba ditiba nubiyúha len Jesús-ni kini abittu ebeabie ka espíritu satsaha latini nna odelhe kana attu ta subi. <sup>11</sup> Gaxxaba kwe'e i'iya do niha yu'u ixeru ka kuchi, yu'ukana go. <sup>12</sup> Laxkala ka espíritu satsaha nna unnaba ditibakana lenie, rákane:

—Bedhelha ri'itu ata yu'u ka kuchi-na, kini eta'atu latikani.

<sup>13</sup> Jesús-ni nna gwa begwelhabe kana. Nianna beria tteba ka espíritu satsaha lati nubiyúha nna gwata'akana lati ka kuchiha. Ttiba ttu chupa mili ka kuchiha raka. Ka nuha nna biria resu ttebakana gwatsettikana ro'o ttu íyya daa niha nna biginnikana lhe'e indatooha nna ugwapikana inda.

<sup>14</sup> Ka nu se'e gweyú ka kuchiha nna box-unni ttebakana deyyakana gwattixxi'akana nuha lhe'esiha lhe utixxi'akinna ka benne se'e lhe'exxi itúba ka niha. Ka benneha nna biria ttebake gwalannike bixa nuha chi uka. <sup>15</sup> Tti bisinke ata du Jesús-ni nna bilákanie nubiyú beria ka espíritu xxegwiha latini, tseba chi bedo ikini lhe

chiba nuku xoni dona. Nianna yalhá usikanie.  
<sup>16</sup> Ka benne bilákanie nu gwate nubiyú uyu'u espíritu xwegwi latiniha lhe nu gwate ka kuchiha lhe, ka benneha nna utixxi'agabakanie adí ka benne. <sup>17</sup> Nianna tti unnaba ditibake len Jesús-ni kini eriabie lo yu gekeha nna eyye attu ta subi.

<sup>18</sup> Atti beyapi Jesús-ni lo barcuha nna nubiyú beria espíritu xwegwiha latini nna unnaba ditibana lenie kini ugwelhe na sanalhane.

<sup>19</sup> Ttaka lee nna labí uka lebie nna ralee na:

—Beyya lisiluha ata se'e ka benne geluha, nna utixxi'a kanie iyá nu chi ben Tata Xisiha lenlu lhe utixxi'a kanie gasina gwatua lebie lu.

<sup>20</sup> Nubiyúha nna bedá ttebana deyyana. Nianna udulo ttebana utixxi'ana itúba daka Decápolis ge iyá nu chi ben Jesús-ni lenna, nna iyába ka benne binake nuha nna beban-abakanie.

*Jesús-ni beyonie ttu benne nuila lhe beyoingabe xi'iniunná Jairo-ni lhe*

*(Mt. 9:18-26; Lc. 8:40-56)*

<sup>21</sup> Iki de chi beyapi Jesús-ni lo barcuha nna betebie lo indatooha, besine ro'oni daka nu reha. Nianna bedetupa tteba ixé juisiru ka benne kwe'ebie. Labie nna ro'o indaha-liba udúe. <sup>22</sup> Nianna tti bisin ttu ka nu baninna yo'o ata rudheti ka benne Israel-ni ka tisa ge Tata Do Yebáha. Nubiyúha lána Jairo. Tti bilenna Jesús-ni due niha, nianna biyachuna nna bedú xibini arloe, <sup>23</sup> nna unnaba ditibana lenie, rane:

—Nuila to kiahá chi tteba gatti bi'iniha. Uyáchi nna ixxua nálu ikibi kini eyakabi nna abittu gattibi.

24 Nianna udá tteba Jesús-ni die lenna.

Ixe juisiru ka benne danalhake bie nna rukí ya'anibake bie. 25 Lagwi ge ka benne danalhaha sela ttu benne nuila chi anka tsi'inu (12) ida ridobie reni. 26 Yalhá chi gwatebie ugíe lo ixeba ka nu runi ramedí nna chiba beyá iyába nu tee gebie betse'e loobie. Ttaka labí reyake; rutse'e loo nna adíla diana rudialhana gebie. 27 Tti bine ge Jesús-ni, nianna diabie sele lagwi ge ka benne danalhaha, nianna tti ubige daka kwe'e Jesús-ni gwattáne ro'o lari nuku benneha, 28 kumu rakanie: "Kwadiba ro'o xoe sattánaa nna gweyakabaa." 29 Laxkala atti gwattáne ro'o xo Jesús-ni nna loora tteba udú sii reni ridoeha, nianna ute danie deki chiba beyake. 30 Jesús-ni nna tti ute danie deki nu tsitsi ra leeha chi beyoinna ttu benne, nianna tti bodeki loe rulannie lo ka benne danalhaha nna ree ka benneha:

—¿Núnni chi betettanna ro'o xoa-ni?

31 Ka benne rudhetinieha nna ráke bie:

—Sa ralu, ¿núnni betettanna ro'o xoa? Ki gwa yu xeabalu aníli rukí ya'a ka benne ri'i.

32 Ttaka Jesús-ni nna rulannibe abi'iba kwe'ebie kini ilánie nuxa nuha gwattána na ro'o xoeha. 33 Benne nuilaha nna kumu yube nu chi ukaha, aníha uka nna itú rasibanie lhe itú rixidibe ubige nna bedú xibie arlo Jesús-ni, nianna tti utixxi'anie bie iyá tte. 34 Labie nna ree benne nuilaha:

—Xi'ini to, de ugía lelu deki gwadaabaa eyonia lu, de nuha nna gwa beyakabalu. Nnanna nna xen su lasi beyya. Chiba betúa nu ridakalu-na.

<sup>35</sup> Sa dula Jesús-ni rinnebie, ttiru chi bisia ka nu daa lisi Jairo-ni, rákana Jairo-ni:

—Chiba utti xi'iniunnáluha. Bitturu udo doel-halu maestru-ni ki dhabie.

<sup>36</sup> Ttaka Jesús-ni labí bedo nage ge nu ra ka nuha, nianna ree Jairo-ni:

—Bittu gasinlu; sun tteba ugía lelu.

<sup>37</sup> Nianna udá ttebe die nna lanúru nu beg-welhe tsia lenie. Sunruba Pedro-ni lhe Jacobo-ni lhe Juan betsi Jacobo-ni chebie. <sup>38</sup> Tti bisinke ro'o yo'o ge Jairo-ni, nianna bilánie chi risatsa ka benne lhe bilánie ka benne ribesike lhe relen xxattakanie lhe. <sup>39</sup> Atti chi ute'e lhe'e yo'oha nna ree ka benneha:

—¿Beaka análi ruinle lhe beaka ribesi xxattale lhe? Nuila to-ni labí utti bi'in-ni, te'adhiba bi'in-ni.

<sup>40</sup> Ttaka ka benne se'e niha, nna ruxisilake gebie. Lee nna nu benlee nna bebealee iyábake, nianna tti ute'e ata tee nuila toha. Ute'e len ka tata nan gebiha lhe len a tsunna ka benne cheeha lhe. <sup>41</sup> Nianna tti bedaxxue ná nuila toha nna unnebie, ree:

—Talita kumi. —Talita kumi dienna innána: Nuila to, neti rulisaa lu, beyadha.

<sup>42</sup> Looraha tteba beyadha nuila toha nna bedá ttebabi, kumu chiba ankinbi tsi'inu (12) ida. Ka benne se'e niha nna uka tébakanie lhe yalhá bebanakanie lhe. <sup>43</sup> Ttaka Jesús-ni nna bodha'an tsitsibe ree ke anuttu nu kixxi'akanie ge nu chi ukaha lhe rágabe ke:

—Gwalugo nuila to-ni yetta.



## 6

*Jesús-ni besine lhe'esi Nazaret**(Mt. 13:53-58; Lc. 4:16-30)*

<sup>1</sup> Bedába Jesús-ni ata dueha nna deyye lhe'esi Nazaret ata uka lasieha nna deyyagaba ka benne rudhetinieha lenie. <sup>2</sup> Tti bisia sá tti reyaka le ka benne Israel-ni, nianna uta'a Jesús-ni lhe'e yo'o ata rudhetike ka tisa ge Tata Do Yebáha nna uduloe rule'enie ka benne. Ixeba ka benne se'e rudo nagake gebie nna bebanabakanie, nianna ra luesike:

—¿Gá gwaxxí nuní nu raka gen-ni? Lhe, ¿bí elha rieni nuní rapa nuní? Lhe anágaba lhe, ¿gá gwaxxína ka milagru ruinna-ni? <sup>3</sup> ¿Laaba nuníba nuha nu ruin ka mexaha lhe ka xxilaha lhe? Lana ankana xi'in biyú María-ni, lhe anágaba lhe rakana betsi Jacobo-ni lhe José-ni lhe Judas-ni lhe Simón-ni lhe. Anágaba lhe, ¿laaba lhe'esi geri'i-nigaba se'e ka danniha lhe?

De nuha nna bituxxukinna gebie. <sup>4</sup> Nianna ra Jesús-ni kana:

—Ttu benne anke profeta, gaxaba diabie gwa rugwebakana lidhake. Ttaka ka nu lhe'esi geeha lhe ka nu raka luesieha, lhe anágaba ka nu se'e lhe'e yo'o geeha lhe, labí rugwekana lidhaka benneha.

<sup>5</sup> De nuha nna labí uka uni Jesús-ni ni ttu milagru lhe'esi geeha, sunruba ttu chupa ka benne rani uxxua nábie ikike nna beyonie ke.

<sup>6</sup> Lee nna bebanabanie gekani kumu de labí ria lekani gebie.

Iki de nuha nna tti ugwekie lhe'e iyába ka yiesi se'e abi'iba niha bele'enie ka benne.

*Jesús-ni udhelhe ka benne rudhetinieha kini tsiake kixxi'ake ka tisa geeha*

*(Mt. 10:5-15; Lc. 9:1-6)*

<sup>7</sup> Jesús-ni bottupe ka benne tsi'inu (12) rudhetinieha nna udhelhe chupa chupa ka benneha. Begwebie ke lo neda ki ebeake ka espíritu satsa yu'u lati ka benne. <sup>8</sup> Nianna rabie ke:

—Bittu ichele nu ixuinle neda. Suna garroti gebale ichele. Nigaba bittu uja chuba gele lhe nigaba bittu ujale nu gole lhe anágaba bittugaba iche yieti belhiu gele. <sup>9</sup> Suna gwaracha gebale gwalulea lhe bittugaba ichele chupa kwe xole lhe.

<sup>10</sup> Rágabe ke:

—Gaxaba lhe'e yo'o ata isinle, niha-ba gwaltse'e. Axtaliba ganna chi eriale lhe'esiha, la'anialiba nna edále lhe'e yo'o ata bisinleha.

<sup>11</sup> Ganna lhe'e ttu yiesi abittu ulabikana le lhe abittu udo nagakani ge nu kixxi'enle kana, la'ania nna gwaleria lhe'e yiesiha nna gwalukubi biste ni'ale, kini nuha unna liina deki Tata Do Yebáha labí uyu'u lee nu benkana. [Netiru ria, ganna chi bisia sá uin Tata Do Yebáha elhuxtisi ge ka benne se'e yiesi lo yu-ni, la'ania labí ttela elha disa tsitsi uyú ka benne ge Sodoma lhe ka benne ge Gomorra lhe, attichula elha disa uyú ka nu abittu ulabikana leha.]

<sup>12</sup> Ka benne rudhetinieha nna biriabake diake nna rigixxi'akanie ka benne ráke ke deki teeki odúna ke nna odaxxuke neda ge Tata Do Yebáha.

<sup>13</sup> Lhe anágaba lhe bebeagabake ixe ka espíritu xxegwi yu'u lati ka benne lhe rigabigabake seti lati ka benne rani nna gwa reyakabake.

*Juan benne rugadi indaha uchúkana bega ikie  
(Mt. 14:1-12; Lc. 9:7-9)*

<sup>14</sup> Herodes nu rinnabiaha binana ge Jesús-ni kumu lhe'e iyába ka yiesi chi ugwadhi tisa ge nu runieha. Ttu chupa ka benne ráke:

—Juan benne rugadi indaha-ba nuná chi beyaka benbie lagwi ge ka benne chi uttiha. De nuha nna ridaabie runie ka milagru.

<sup>15</sup> Adíkana nna rákana:

—Elías-niba nuná.

Adíkana nna redenákana:

—Ttu ka profeta use'e itú nu reha-ba nuná.

<sup>16</sup> Tti biyienin Herodes-ni nu ra ka benneha, nianna tti rana:

—Juan nu begadi indaha-ba nuná, delába nu udhelhaa kini uchúkana ikiniha. Labana nuná chi beyaka benna lagwi ge ka benne chi uttiha.

<sup>17-18</sup> Kumu kwinaba Herodes-ni udhelhana gwadaxxukana Juan-ni nna bexxikakana na lhe'e lisiyyaha. Aníha benna de utisa Juan-ni na delo ni'a ge de bedo lenna Herodías nu anka nuila ge betsini Felipe-ni. Bituxxuun Herodes-ni kumu de ra Juan-ni na: “Labí ga'anna edo lenlu nuila ge betsilu-na.” <sup>19</sup> De nuha nna bedo le nuilaha Juan-ni nna benna uttina na, ttaka labí udaana, <sup>20</sup> kumu Herodes-ni usibinna Juan-ni, kumu yúbana deki benneha anke ttu benne runie nu dika ixú lhe ankagabe ge Tata Do Yebáha lhe. De nuha nna biyú tsitsibana Juan-ni nna atti rudo naganí ge benneha, nna gwa ru'uba leni ge nu rigixxi'anie naha, meskiba tti riyieninna nu rinneehe nna rudú chupana leni. <sup>21</sup> Ttaka tti bisia sá gwadoni Herodes-ni ida, la'ania nna uxina adíru ka nu yala rise'e

kwe'eniha lhe ka nu loni ge ka soldaduha lhe anágaba ka nu ra xxeni lekani se'e Galilea-ni lhe, kini i'iya gokana lenna. La'ania nna Herodías-ni, delába nuila ge Herodes-ni, upana lo neda benna nu rulaba leniha. <sup>22</sup> Tti lo se'e ka Herodes-ni ro'o mexaha, la'ania nna uta'a xi'iniunná Herodías-ni ata se'ekanaha nna udulona ruya'ana. Herodes-ni nna uyu'uba leni lhe ka nu se'e lenna ro'o mexaha lhe. Nianna tti rana nuila kwitiha:

—Unnababa bixaba raka lelu, neti nna gutebaa nuha gelu.

<sup>23</sup> Nianna tti bodha'an tsitsi tisa geni len nuilaha, rana nuha:

—Bixaba raka lelu innabalu nna gutebaa na gelu. Meskiba salhe ka lo yu ata rinnabiaya-ni utea gelu.

<sup>24</sup> Nuilaha nna beria ttebana deyyana nna rana nan geniha:

—¿Bíla innabaa ganna?

Nan geniha nna rabie na:

—Bega iki Juan nu rugadi indaha unnaba.

<sup>25</sup> Nianna rigába nuila kwitiha beta'ana ata re Herodes nu rinnabiaha, nianna tti rana na:

—Looraha tte nnanna raka lasia taxxílu bega iki Juan nu rugadi indaha nna ku'ulu na lhe'e ttu ye'ena nna utelu na len neti.

<sup>26</sup> Meskiba bedú si'i xxattana le Herodes-ni, ttaka de chi bodha'an tsitsi tisa geni len nuilaha lhe de chi biyienin ka nu se'e lennaha lhe, aníoka nna labí uka dhu disana utena nu rinnaba nuilaha. <sup>27</sup> Nianna tti udhelha ttebana ttu soldadu kini tsia nuha taxxína bega iki Juan-ni.

<sup>28</sup> Soldaduha nna ugía ttebana gwachúna bega

iki Juan-ni lhe'e lisiyyaha. Nianna tti begu'una bega iki benneha lhe'e ttu ye'ena nna bogwena nuila kwitiha. Nuila kwitiha nna botena nuha len nan geniha.

<sup>29</sup> Atti chi bina ka benne rudhetini Juan-ni nu chi ukaha, nianna ugía ttebake gwaxíke benne yattiha nna bekatsike benneha.

*Jesús-ni begobie gayu mili ka benne*  
(Mt. 14:13-21; Lc. 9:10-17; Jn. 6:1-14)

<sup>30</sup> Atti besin ka apóstol-ni ugíake gwat-tixxi'akanie ka benne ka tisa ge Tata Do Yebáha, nianna betupa ttebake len Jesús-ni nna utixxi'akanie bie ge iyá nu benke lhe iyá nu bele'ekanie ka benneha lhe. <sup>31</sup> Jesús-ni nna ree ke:

—Sun lebi'iba gwaltá tsiari'i ata anuttu benne se'e kini eyaka lele latti.

Aníha ree ke kumu ata se'ekeha ixeba benne risia lhe redá lhe, laxkala niba neda a rapake goke.

<sup>32</sup> Aníha uka nna bedaxxuke barcu nna sun labake diake ata lanú benne se'e. <sup>33</sup> Ttaka ixeba ka nu bilákinna ke diake nna beyoinbiabakana ke. Nianna biria ttebakana lhe'e iyába ka yiesi se'e niha, nna ni'abakani diakana bisinkana ata isinkeha. Laxkala chila se'ekana niha atti bisinke. <sup>34</sup> Tti ugwadi Jesús-ni lo barcuha nna bilánie chi re xxatta benne niha. Nianna gwatua lebie ke kumu se'ebake attiba ka neru to anú tee tsekina lokani. Nianna tti uduloe ixeba nu bele'enie ke. <sup>35</sup> Ttaka chi galá dia ubisa-na nuha, nianna tti ubiga ka benne rudhetinieha nna ráke bie:

—Ttiruba chi dia ura nuní lhe gwea nna ata se'eri'i-ni yu bisiba nuní, labí bixa tee nii.  
<sup>36</sup> Bedhelhala ka benne-ni kini eyyake ata sia ka yo'o lhe'exxi o si lhe'e ka yiesi to se'e abi'iba ata se'eri'i-ni kini tayo'oke nu goke.

<sup>37</sup> Ttaka labie nna bekaibilee, ree ka benneha:

—Lebi'iba gwalugwe ka benne-ni nu goke.

Ka benne rudhetinieha nna bekaibike, ráke:

—¿Gasina tayo'otu nu go ka benne-ni? Ixeni belhiu iyasinri'i; ge chupa gayua (200) sá sina teeba nuha ise'e loo kini iyo'o nu go ka benne-ni.

<sup>38</sup> Jesús-ni nna ree ke:

—¿Balha yettaxtila chele? Gwatayúchu.

Atti chi gwalannikeha nna ráke bie:

—Ne gayuruba yettaxtila nna a chupa ka belha nna.

<sup>39</sup> Jesús-ni nna ree ke:

—Gwalose'e ka benne-ni dhi dhi lo ixxi binni ya'a-ni.

<sup>40</sup> Nianna dhi dhiba bese'e ka benneha, benne bese'eba de gayua (100) lhe benne bese'eba de tsieyona (50) lhe. <sup>41</sup> Nianna tti bedaxxu Jesús-ni gayu ka yettaxtilaha lhe a chupa ka belhaha nna tti belhidha loe yebáha nna begwebie Tata Do Yebáha ixkixaru. Nianna tti ulhe'e lhe'e ka benneha nna begwebie ka benne rudhetinieha, kini ka benneha nna utidhike benneha len ka benne se'e niha. Aníha-gaba benie len chupa ka belhaha, ulhe'e lhe'e ka nuha nna begwebie iyá tteke. <sup>42</sup> Iyábake utoke axtaba beyielakanie.

<sup>43</sup> Iki de chi utokeha nna bottuparulake a tsi'inu (12) sumi ka yettaxtila ro'o salha'a bexxaha lhe nu bexxa ge ka belhaha lhe. Besá tí ka sumiha.

<sup>44</sup> Ttiba ttu gayu mili ka benne biyúha utoke.

*Jesús-ni ridábie lo indatooha*  
(Mt. 14:22-27, 34-36; Jn. 6:15-21)

<sup>45</sup> Iki de nuha nna ben Jesús-ni kini beyapi ka benne rudhetinieha lo barcuha ki eneru gaake eyyake nna esinke ro'o indatooha daka nu reha, daka ata re lhe'esi Betsaida, laka lee nna richú tise ka benne se'e niha. <sup>46</sup> Tti chi beyaka uchú tise ka benneha, nianna tti ugwapie iki ttu i'iya do niha kini unne lenbie Tata Do Yebáha. <sup>47</sup> Atti chi ulhaha nna lagwi indatooha-li chi deyya barcu ata deyya ka benne rudhetinieha. Jesús-ni nna ttúbe beya'ane yu bisi. <sup>48</sup> Tti bilánie yalhá rate xxatta ka benne rudhetinieha ki rodháke barcuha, kumu daka arlo barcuha-la retetsu'u beha, lee nna tti chi daa tsaniha, dedábie ata dedá ka benneha, redábie lo indaha, runie etebie loke. <sup>49</sup> Tti bilákanie bie dedábie lo indaha, nianna ukakanie ganna nu du elaba nuha. Nianna uresi'ake, <sup>50</sup> kumu iyábake rilákanie nuha nna rasibakanie. Jesús-ni nna unne ttebe, ree ke:

—¡Tsitsi gwalikweki lele! ¡Bittu gasinle!  
¡Netiba nuní!

<sup>51</sup> Atti chi beyapie lo barcu ata dedákeha, nianna ure tteba beha. Lake nna uka tébakanie lhe bebana xxattakanie ge nu ukaha lhe, <sup>52</sup> kumu lake ituaba a rite dákanie ge nu uka tti begobie ka benne yettaxtilaha, kumu sa yayaba ikike.

<sup>53</sup> Iki de chi beteke lo indatooha nna besinke lo yu ge Genesaret. Nianna begalhake barcuha ro'o indatooha. <sup>54</sup> Sun tteba ugwadike lo barcuha nna beyoinbia tteba ka benne se'e niha Jesús-ni. <sup>55</sup> Nianna ugweki tteba ka benne se'e niha lhe'e iyába ka yiesi se'e abi'iba niha kini raxxíke ka benne rani nna richeke ka benneha rixuakanie

ke lo breta, risin lenke ka benneha ata runake du Jesús-ni. <sup>56</sup> Gaxaba dia Jesús-ni, sila ritebie lhe'e ka yiesi xka'a to lhe sila ritebie lhe'e ka yiesi elha lhe, o sila ritebie ka lhe'exxi ata se'e ka benne lhe, ata ritebieha niha ruse'eke ka benne raniha ro'o ka neda nna rinnabake len Jesús-ni, kini ugwelhe kwadiba ro'o lari nukueha udaxxu ka benneha kini eyakake. Aníha-ba ruin ka benne raniha rudaxxuke ro'o xoeha nna reyaka ttebake.

## 7

*Nu satsa ruinri'i, nuná rutsigana ri'i arlo Tata Do Yebáha*  
(Mt. 15:1-20)

<sup>1</sup> Ka fariseo-ni lhe attu chupa ka nu rule'ekinna ka benne nu ra lo bia bennabi bodha'an Moisés-ni, ka nuha dákana lhe'esi Jerusalén-ni, nna ubigakana ata du Jesús-ni. <sup>2</sup> Tti bilákinna tsigaba anka ná ttu chupa ka benne rudhetini Jesús-ni tti roke yetta; delába labí utí náke, labí benke ttiba labini ka benneola ge ka nu Israel-ni ruinkana, de nuha nna riguakana bala'ana ge ka benneha. <sup>3</sup> Kumu ka fariseo-ni lhe adíru ka nu Israel-ni, sa ruinbakana ttiba ben ka benneola gekaniha. Ka benneola gekaniha labí kwenta go ka nuha yetta ganna abíba chi utí nákani, <sup>4</sup> lhe anágaba tti resinkana riakana ugo'o lhe'eyya, labí kwenta gokana yetta ganna abíba chi utí nákani. Ixerugaba nu labikinna ruinkana: ttibanka teeki kíkana ka kanti lhe ka xiga [ka nu rixúkinna kini ri'iyakana lhe'ekani] lhe anágaba adíru ka nu anka ge bronze ka



nu rixúkinna ki riga'akana elho lhe'ekani. [Lhe anágaba, aloba teeki kíkana ka nu rise'ekana loni tti rokana yetta.] <sup>5</sup> De nuha nna ka fariseo-ni lhe ka nu rule'ekinna ka benne nu ra lo bia bennabiha, unnaba tisakana Jesús-ni, rákane:

—¿Beakala ka nu rudhetinlu-na labí ruinkana nu bodha'an ka benneola geri'iha uinri'? Ka nuná itupa tsigaba anka nákani rokana.

<sup>6</sup> Lee nna bekabie ree kana:

—Lebi'i xa fariseo, labí liinle. Delo tisaba ruinle deki ankale benne tse. Gwalíbani profeta Isaías-ni tti unnena lo ka yetsi ge Tata Do Yebáha ge nu ruinle. Lo ka yetsi geeha rabie:

Ka nuní len ro'oruba ka nuní rákana deki ria lekani neti,

ttaka labí gwalíkinna rakakinna kia.

<sup>7</sup> Kwentaruba rudú xibikani arloa, kumu nu anka ge benne se'e yiesi lo yu-niba rule'ekana,

labí nu anka kia nuná rule'ekinna ka benne.

<sup>8</sup> Kumu lebi'i rudhanbale labíru ruinle nu bodha'an Tata Do Yebáha uinri'i, ge nu labin ka benne se'e yiesi lo yu-nila rudoruna lele ruinle, [delába rudorulana lele rigíle ka kanti lhe ka xiga ka nu ri'iyale lhe'ekinna, lhe anágaba nna ixerugaba ka luesi nuná labinle ruinle].

<sup>9</sup> Rágabe kana:

—¿Lebi'i, kattipa lhe'e ruinle! ¿Rigu'uba ni'ale nu bodha'an Tata Do Yebáha uinri'i nna rudorulana lele ruinle nu chi labinle ruinle! <sup>10</sup> Ki yule Moisés-ni bodha'anna rana: “Tsia lele ka tata nan gele” lhe rágabana: “Nu rigena iki ka tata nan geniha, ralhaba nuha gattina.” <sup>11</sup> Ttaka lebi'i nna rálale: “Ttu benne gwakaba gebie gee ka

tata nan geeha: Labí aka utea nu tee kia-ni len lebi'i, kumu iyába nu dika utea len lebi'i, Tata Do Yebáha-la chi ga'anati ugwea bie nuní." <sup>12</sup> Aníha ruinle kini benneha nna abitturu utee nu daa loe ugwebie ka tata nan geeha. <sup>13</sup> Aná tte nuná nna rigu'u ni'ale ka tisa bodha'an Tata Do Yebáha delo ni'a ge nu rodha'an len luesile ruinle lhe anágaba nna ixeerugaba ka luesi nuní labinle ruinle.

<sup>14</sup> Nianna tti bedexi Jesús-ni ka benne saa niha attu libe nna redeabie ke:

—Gwaludo naga iyále kia nna gwalutte da nu inníá-ni. <sup>15</sup> Labí nu rori'i rutsigana ri'i arlo Tata Do Yebáha, sinuki nu riria lhe'e lastolari'i nuná rutsigana ri'i arlo benneha. <sup>16</sup> [¡Ata sia nagale, gwaludo nagale ganna gwankale nu dika iyienini!]

<sup>17</sup> Tti bedá Jesús-ni ata se'e ka benne tupa niha, nianna besine lhe'e yo'oha. Ka benne rudhetinieha nna unnaba tisake bie bixa diani nu utixxi'anie keha. <sup>18</sup> Nianna ree ke:

—¿Si anágaba lebi'i, si abittugaba rite denle nu ria-ni? ¿Si lagwa gwa rite denle deki iyába nu rori'i-na laa nunága nuná rutsigana ri'i arlo Tata Do Yebáha? <sup>19</sup> Kumu laa lhe'e lastogari'i dia nu rori'i, lhe'e tu'ebari'i dia nuná, delola nna rebeabari'i nuná.

Tti ra Jesús-ni aníha, benna liie deki iyába nu rori'i ankana nari.

<sup>20</sup> Rágabe:

—Nu riria lhe'e lastolari'i nuná rutsigana ri'i arlo Tata Do Yebáha, <sup>21</sup> kumu lhe'e lastolari'i nuná riria nu satsa rulaba leri'i,

lhe nágaba nuná riria nu ruinri'i ttixka rido  
 lenri'i nu abittu anka latselari'i,  
 lhe nágaba nuná riria nu ruinri'i tti risári'i nu  
 subi subi,  
 lhe anágaba lhe'e lastogabari'i riria nu rixeg-  
 wiri'i ki ruinri'i elhutti,  
<sup>22</sup> [lhe ruinri'i ubana lhe].  
 Lhe anágaba lhe'e lastogabari'i nuná riria nu  
 raka xxatta leri'i gatta geri'i,  
 lhe nágaba nuná riria iyá nu abittu anka tse,  
 lhe nágaba riria ka gwen lasi,  
 lhe iyá nu satsa ridá leri'i ruinri'i,  
 lhe anágaba, lhe'e lastogabari'i riria nu ritisin  
 luesiri'i,  
 lhe nágaba nuná riria nu rinne satsari'i ge ka  
 benne,  
 lhe nágaba nuná riria elha ttaba ruinri'i,  
 lhe nágaba nuná riria nu ruinri'i tti a re itá ikiri'i.  
<sup>23</sup> Iyá nu satsa ruinri'i-na, lhe'e lastobari'i raka  
 xxe nuná. Iyá nuní ruinna kini rutsigana ri'i arlo  
 Tata Do Yebáha.

*Jesús-ni beyonie xi'iniunná ttu benne nuila  
 abittu anke nu Israel*

*(Mt. 15:21-28)*

<sup>24</sup> Bedába Jesús-ni ata dueha, nianna tti die  
 daka Tiro lhe Sidón lhe. Tti chi bisine niha, nna  
 ute'e lhe'e ttu yo'o. Labí uka lebie nuxa unana  
 deki doe niha, ttaka labí uka dhoe gatsi, <sup>25</sup> kumu  
 bina tteba ttu benne nuila do ttu xi'iniunne yu'u  
 ttu espíritu satsa latini, bine deki do Jesús-ni  
 niha. Nianna ugía ttebe nna bedú xibie arlo  
 Jesús-ni. <sup>26</sup> Benne nuilaha nna unnaba ditibe  
 len Jesús-ni kini ebeabie espíritu satsa yu'u lati

xi'iniunneha. Benne nuilaha labí anke nu Israel, sinuki benneha dabie daka Sirofenicia <sup>27</sup> Ttaka Jesús-ni nna bekabie ge benneha, ree:

—Begwelhaxa eyielani ka xi'inia-ni, delába ka benne Israel-ni. Kumu labí anka tse udaxxua yettaxtila nu dika go ka xi'inia nna udelhaa na lo ka beku to-na.

<sup>28</sup> Benne nuilaha nna bekabie ree:

—Gwalí galenlu, xa tata. Ttaka yulu axtala ka beku to-na gwa redigagaba ka bia to-na ka yettaxtila ro'o yuya riginni xani'a mexa ge ka nuto-na.

<sup>29</sup> Jesús-ni nna ree benneha:

—Gwalíba nu ralu-na. De bekabilu aná, de nuha nna xen su lasi beyya, kumu chiba beria espíritu xwegwiha lati xi'iniunnáluha.

<sup>30</sup> Atti besin benne nuilaha lisieha nna gwaxxake xi'iniunneha tena, chiba beria espíritu xwegwiha latini.

### *Jesús-ni beyonie ttu benne anke kwechu*

<sup>31</sup> Tti beyeki Jesús-ni beriabie Tiro, nianna deyye daka Sidón nna betebie daka Decápolis ki besine ro'o indatoo ge Galilea-ni. <sup>32</sup> Nianna bisin lenkana ttu benne ata du Jesús-ni. Benneha anke kwechu lhe labí rilí ro'e innee lhe. Nianna unnabakana len Jesús-ni ki ixxua nábie iki benneha kini eyake. <sup>33</sup> Jesús-ni nna bekwitta lenie benne biyúha ata se'e ka benne ixeha, nianna tti bega'a xubene lhe'e ka naga benneha. Nianna tti bettuttu xxenie lo xubene nna utane lo lhuse. <sup>34</sup> Nianna tti belhidha loe begíe gwetsáha nna benné lebie, nianna tti unnee, ree:

—¡Efata! —Efata dienna innána: ¡Gwaleyali!

<sup>35</sup> Looraha tteba beyali ka naga benneha lhe bolhána lhuseha nna tseba unnebie. <sup>36</sup> Jesús-ni nna ree ka benne se'e niha:

—Nuttu nu kixxi'enle ge nu chi uka-ni.

Ttaka meskiba bika ree ka benneha bittu kixxi'ake ge nu benieha, ttaka ka benneha nna adíla benke utixxi'abake. <sup>37</sup> Iyábake bebana xxattakanie nna ráke:

—¿Tseba anka iyá nu runie! ¡Redhalie naga ka benne anka kwechu lhe redhalie ro'o ka benne ankake biría lhe!

## 8

### *Jesús-ni begobie ttapa mili ka benne*

*(Mt. 15:32-39)*

<sup>1</sup> Attu sá bedetupa ixé juisiru ka benne ata du Jesús-ni, ttaka labí nu goke tee. Nianna tti uxie ka benne rudhetinieha nna ree ka benneha:

<sup>2</sup> —Ratua lasia ka benne se'e nii, kumu chiba uka tsunna ubisa se'eke len neti nna birula tee bixa goke. <sup>3</sup> Ganna suna anába ankake edhelhaa ke ki eyya lisike, la'ania nna ka satú leke, kumu adí ka benne-ni idittuba dáke.

<sup>4</sup> Ka benne rudhetinieha nna bekabike, ráke:

—¿Gála saxxíri'i nu go ka benne-ni? Ki lo yu bisiba nuní se'eri'i.

<sup>5</sup> Nianna ra Jesús-ni ke:

—¿Balha yettaxtila chele?

Lake nna bekabike ráke:

—Gasirubake chetu xa.

<sup>6</sup> Nianna benie kini bese'e ka benne tupa niha lo yu nna tti bedaxxue gasi ka yettaxtilaha nna iki de chi begwebie ixkixaru len Tata Do Yebáha, nianna tti ulha'abie lhe'e ka yettaxtilaha nna

begwebie ka benne rudhetinieha kini kidhike benneha ge iyá ka benne se'e niha. Ka benne rudhetinieha nna aníha-ba benke. <sup>7</sup> Ka benneha chegabake ttu chupa ka belha to nna iki de chi begwe Jesús-ni ixkixaru len Tata Do Yebáha, nianna tti redee ka benne rudhetinieha kidhigabake ka belhaha kini go ka benne se'e niha. <sup>8</sup> Iyába ka benneha utobake axtaba beyielakanie nna bottuparulake a gasi ka sumi ka benne ro'o salha'a bexxaha. <sup>9</sup> Tu ttu ttaapa mili ka benneha utoke. Nialiba nna tti bodhíbie ka benneha deyyake. <sup>10</sup> Lee nna beyapi ttebe lo barcuha lenie ka benne rudhetinieha nna bisinke daka Dalmanuta.

*Ka fariseo-ni rinnabakana uin Jesús-ni ttu milagru*

*(Mt. 16:1-4; Lc. 12:54-56)*

<sup>11</sup> Tti bisin ka fariseo-ni ata du Jesús-ni, nianna udulo ttebakana uxaka lenkane. Raka lekani unie ttu milagru. Aníha ruinkana kini ku'ukane prueba ki ula'a ganna gwalí Tata Do Yebáha udhelhe bie.

<sup>12</sup> Jesús-ni nna benné lebie nna ree:

—¿Beaka raka le ka benne se'e nnanna ilákanie unia ttu milagru? Netiru ria: labí unia bixa ttu milagru ki ilákanie.

<sup>13</sup> Niha-ba bese'ebie ka fariseo-ni nna beyapie lo barcuha. Betebie lo indaha nna besine ro'oni daka nu reha.

*Jesús-ni rabie: “Gwaluyú gele len ka fariseo-ni”*

*(Mt. 16:5-12)*

<sup>14</sup> Ka benne rudhetinieha nna bixulhabakanie icheke nu goke, sunruba ttu túbi yettaxtila cheke lo barcuha. <sup>15</sup> Nianna ra Jesús-ni ke:

—Gwaluyú gele ka iyietile kua dii ge ka fariseo-ni lhe kua dii ge Herodes-ni lhe.

<sup>16</sup> Nianna tti ra luesike:

—Ganna de abíba yettaxtila cheri'i, de nuha-ba nna rabie ri'i aná.

<sup>17</sup> Ttaka Jesús-ni nna ute dábanie nu rákeha, nianna tti ree ke:

—¿Beaka ra luesile deki labí yettaxtila tee? ¿Si itua ttu a rite denle lhe a rutte dale nu ria-ni? ¿Laa tuttíruba yaya ikile? <sup>18</sup> ¿Laaba gwa yu'uba iyya lole nna a rilenle lhe gwa siaba nagale nna a riyieninle? ¿Si lagwa gwa radú lele <sup>19</sup> tti ulha'aya lhe'e gayu ka yettaxtila uto gayu mili ka benneha? La'ania, ¿a balha sumi besá ka yettaxtila ro'o salha'a bottupaleha?

Lake nna bekabike, ráke:

—A tsi'inu sumi (12).

<sup>20</sup> Nianna redenee:

—Atti ulha'aya lhe'e gasi ka yettaxtila uto ttpa mili ka benneha nna, ¿a balha ka sumiha besá ka yettaxtila ro'o salha'a bottupaleha?

Lake nna bekabike, ráke:

—A gasi sumi.

<sup>21</sup> Nianna ree ke:

—¿Ganna aníha nna beakala a rite denle?

*Lhe'esi Betsaida, niha bedhali Jesús-ni lo ttu benne xua loe*

<sup>22</sup> Tti besin ka Jesús-ni lhe'esi Betsaida, ka benne ge niha nna bisin tteba lenke ttu benne lo xua ata du Jesús-ni, nianna unnaba ditibake lenie kini kane ka iyya lo benneha. <sup>23</sup> Lee nna

bedaxxu ttebe ná benne lo xuaha nna uleabie benneha ro'o yiesiha. Nianna ttibettuttu xxenie kini utabie ka iyya lo benneha lhe uxxua nábie ikie lhe, nianna tti unnaba tise benneha, ree:

—¿Si bi gwa chi relenlu ttuxka'a to?

<sup>24</sup> Benneha nna belannie nna ree:

—Chiba reláti ka benne, ttaka rula'abati ke ttiba ttu yaga ridá.

<sup>25</sup> Nianna tti bedegan Jesús-ni ka iyya lo benneha attu libe. La'anialiba nna chi beyaka ka iyya loeha nna belá tsenie iyá tte. <sup>26</sup> Nianna tti bedhelha Jesús-ni benneha deyye lisie nna ree bie:

—Abittu sata'alu lhe'esi-ni [lhe abittugaba kixxi'enlu ka benne se'e lhe'esi-ni lhe].

*Pedro-ni rabie Jesús-ni: “Lu ankalu Cristu”*

*(Mt. 16:13-20; Lc. 9:18-21)*

<sup>27</sup> Delola nna bederia Jesús-ni dia lenie ka benne rudhetinieha, diake daka ta se'e ka yiesi to se'e daka Cesarea ge Filipino. Tti yu'uke nedaha nna unnaba tise, ree ke:

—¿Nú ra ka benne deki ankaa?

<sup>28</sup> Ka benneha nna bekabike, ráke:

—Ttu chupa ka benne ráke deki lu ankalu Juan benne begadi indaha nna attu a chupake nna redenáke deki lu ankalu Elías, nna adíke nna ráke: “Ttu ka benne uka profeta ge Tata Do Yebáha-ba nuná.”

<sup>29</sup> Nianna ra Jesús-ni ke:

—Lebi'i nna, ¿núla rale deki ankaa?

Pedro-ni nna bekabina rana:

—Lu ankalu Cristu benne chi ga'anani Tata Do Yebáha idhelhe.

<sup>30</sup> Jesús-ni nna bodha'an tsitsie, ree ke:



—Anuttu nu gale deki neti ankaa Cristu.

*Jesús-ni rigixxi'abie deki teeki uttikane*  
(Mt. 16:21-28; Lc. 9:22-27)

<sup>31</sup> Nianna tti udulo Jesús-ni rabie ke:

—Neti benne daya yebáha teeki tate xxattaa uyúá elha disa. Ka benneola geri'iha lhe ka nu loni ge ka bixxudiha lhe, anágaba ka nu rule'ekinna ka benne nu ra lo bia bennabi bodha'an Moisés-ni lhe, ka nuha ku'u ni'akani neti lhe uttikana neti lhe. Ttaka iki de chi beyonna ubisa uttiaha, la'ania nna eyaka benbaa attu libe.

<sup>32</sup> Lhixxa rába utixxi'e nuha. Laxkala Pedro-ni uxine attu ta subi nna utisane.

<sup>33</sup> Ttaka lee nna bodeki loe ata se'e adí ka benne rudhetinieha nna bedhaka dise Pedro-ni, ree na:

—¡Ubi'etta kwe'a xa nu xxegwi! Kumu lu nu anka ge ka benne se'e yiesi lo yu-niba do ikilu; labí do ikilu nu anka ge Tata Do Yebáha.

<sup>34</sup> Nianna tti uxie iyába ka benne se'e niha lhe ka benne rudhetinieha nna ree ke:

—Ganna nuxa ttúle raka lele etenalhale neti, teeki eria iki eria lele, meskila bixa satele nna gwaludaxxu kurusi gele nna gwaltá gwetenalha neti. <sup>35</sup> Kumu ttu benne ganna abittuba raka lebie bixa satebie de etenalhe neti, benneha nnittilee, delába labí aka ben benneha arlo Tata Do Yebáha. Ttaka benne eria iki eria lebie meskila bixa satebie delo ni'a kia lhe delo ni'a ge ka tisa ge Tata Do Yebáha lhe, benneha gwalálee.

<sup>36</sup> Kumu, labí ixú nuha ganna ttixka ttu benne dhaabie uin gebie iyá nu se'e yiesi lo yu-ni, ttaka arlo Tata Do Yebáha nna tsia nnittilee.

<sup>37</sup> Nigaba labí aka geri'i go'ori'i elha nabani geri'i, kini anáchu aka benri'i ttu dia lii arlo Tata Do Yebáha. <sup>38</sup> Kumu ganna ttu benne ettunie kia lhe ettunie ge ka tisa kia-ni arlo ka nu chi ruin satsa se'e nnanna, lhe chi rudhá ikikani Tata Do Yebáha, anágaba neti benne daya yebáha ettugabati gekani ganna chi dedáya lhe'e xiani ge Tata kiaha len ka anjeli geeha.

## 9

<sup>1</sup> Rágaba Jesús-ni ke:

—Netiru ria: ttu chupale se'ele nii nnanna labí chi uttile axtaliba ganna chi bilenle isia Tata Do Yebáha innabie lhe ra tsitsi lebie lhe.

*Jesús-ni tti due iki i'iyaha besea lobie*  
(Mt. 17:1-13; Lc. 9:28-36)

<sup>2</sup> Iki de chi ute xxupa ubisaha nna tti ugwapi Jesús-ni iki ttu i'iya xeni do niha, chebie sun Pedro-niba lhe Jacobo-ni lhe Juan-ni lhe. Niha besea lobie arlokani. <sup>3</sup> Ka xoeha raka lhalhabakana lhe sitsi túba beyakakana lhe. Ni ttú benne do yiesi lo yu-ni dhaabie otsitsie ttu lari atti beyaka ka xo Jesús-ni la'ania. <sup>4</sup> Lengwa chi bela'akinna uka xxe Elías-ni lhe Moisés-ni lhe, se'eke gwenne len Jesús-ni. <sup>5</sup> Pedro-ni nna rana Jesús-ni:

—Maestru, ¡gwen tte uka se'etu nii! Usiatu tsunna ka yo'o lhaga gele: ttu gelu nna ttu ge Moisés-ni nna attu ge Elías-ni nna.

<sup>6</sup> Aníha-ba rana kumu de labí yuna bixa innána de si rasilakinna. <sup>7</sup> Nianna tti bebe tteba ttu bea ata se'ekeha. Lhe'e beaha nna biyien tsi'i ttu benne unnebie, ree:

—Benne-ni anke Xi'inia lhe rakati gebie lhe. Ge benne-ni gwaludo nagale.

<sup>8</sup> Ttiruba nna ttu nnelaba benitti loo ka benneha, laxkala atti bodeki lokani belanikana abi'iba kwe'ekani nna nurua ka benneha bilákinna, a sunruba Jesús-ni du niha.

<sup>9</sup> Tti deyyake reyadike lati i'yaha nna ra Jesús-ni kana:

—Nuttu nu kixxi'enle ge nu bilenle-ni axtaliba ganna neti benne daya yebáha chi beyaka bania attu libe lagwi ge ka benne chi uttiha, la'anialiba nna chi dina kixxi'ale.

<sup>10</sup> Lake nna labí utixxi'ake, gwa ulu'uba leke nuha. Sun raba luesike: “¿Bíla dianie tti ree deki eyaka benbe attu libe?”

<sup>11</sup> Nianna tti unnaba tisake Jesús-ni, ráke bie:

—¿Beakala ka nu rule'ekinna ka benne nu ra lo bia bennabi bodha'an Moisés-ni nna rákana deki Elías-ni teeki esie lade'a tte, niala nna tti isia Cristuha?

<sup>12</sup> Jesús-ni nna bekabie, ree kana:

—Gwalí galá deki Elías-ni esie lade'a tte ki ose'e tsebie iyá nu se'e. Ttaka ganna aníha aka nna, ¿beakala ra lo ka yetsi ge Tata Do Yebáha deki neti benne daya yebáha teeki sate xxattaa lhe ku'u ni'akani neti lhe? <sup>13</sup> Ttaka neti ria, Elías-ni chiba bita benneha nna bedhak-abakane attiba ukaba lekani, benbakana attiba chi ga'anna lo ka yetsi ge Tata Do Yebáha satebie.

*Jesús-ni beyonie ttu nu kwiti yu'u ttu espíritu xwegwi latini*

*(Mt. 17:14-21; Lc. 9:37-43)*

<sup>14</sup> Tti besin Jesús-ni lenie a tsunna ka benneha ata se'e adíru ka benne rudhetinieha, nianna

gwaxxakake ixe juisiru ka benne chi tupake abi'iba kwe'e ka benneha. Niha-gaba se'e ka nu rule'ekinna ka benne nu ra lo bia bennabi bodha'an Moisés-ni. Ka nuha ridaka lenkana ka benne rudhetinieha. <sup>15</sup> Ka benne se'e niha nna tti chi bilákanie dedá Jesús-ni nna iyábake bebanakanie, nianna biresu ttebake gwatsáke bie ki gwagweke bie padiuxi. <sup>16</sup> Jesús-ni nna unnaba tise ka benne rudhetinieha, ree ke:

—¿Bíunna ridaka lenle ka nuná?

<sup>17</sup> Ttu benne sela lhe'e ka benne tupa niha nna bekabie ree:

—Xa tata maestru, laa chea xi'in biyúa-ni len kwinalu. Yu'u ttu espíritu xwegwi latibi nna bodha'anna bi biría, nuní runi ki bittu raka innebi. <sup>18</sup> Gaxaba dubi rettina gebi nna tti rurixxi lona bi ribeana kuchina ro'obi, lhe raka rriba lo layabi. Nianna tti rodá yaga ttebana latibi. Chi unnabaa len ka benne rudhetinlu-ni kini ebeake espíritu xwegwi-ni latibi, ttaka labí udaake.

<sup>19</sup> Jesús-ni nna ree ka benneha:

—¡Aalexa nu a ria leni! ¿Nukalila sa dhua len lebi'i? ¿Nukalila sa utto uchíaya ge nu ruinle? Daka aní gwataxxí nu kwiti-na.

<sup>20</sup> Nianna tti gwaxxíke nu kwitiha, ttaka tti bilani espíritu yu'u lati nu kwitiha Jesús-ni, nianna bexxidi ttebana nu kwitiha, nna betesina na lo yu, lhe ribeana kuchina ro'oni lhe. <sup>21</sup> Jesús-ni nna unnaba tise tata ge nu kwitiha, ree benneha:

—¿Si isá chi ridakabi nuní?

Benneha nna bekabie ree:

—Attiliba ankabi nutoha xa. <sup>22</sup> Ixe lidú chi bedelhana bi lo gi lhe bedelhana bi lhe'e inda

lhe, ruinna uttina bi. Laxkala ganna gwaka gelu uinlu ttu bixa, gwatuachi lelu ri'itu lhe betechi nálu len ri'itu.

<sup>23</sup> Jesús-ni nna bekabie ge benneha, ree:

—¿Gasina nuha nna innálu: “Ganna gwaka gelu”? Neti ria, nu ria leniha gwakaba iyába nu innabana.

<sup>24</sup> Tata ge nu kwitiha nna unne ttebe idisa, ree:

—¿Gwa ria galá lasia! ¡Rinnabaa len kwinalu, akachi lenlu neti kini tsia chiettiru lasia!

<sup>25</sup> Tti bilani Jesús-ni adíla chi rituparu ka benne, nianna bedhaka dise espíritu satsaha, ree nuha:

—¡Espíritu kwechu lhe biría lhe, neti rulisaa lu! ¡Beria lati nu kwiti-ni nna bitturu eteta'alu latini!

<sup>26</sup> Espíritu satsaha nna ribesi'abana, nianna tti bodoxxidi xxattana lati nu kwitiha attu libe, niala nna tti beriana. Nu kwitiha nna ttiba ttu nu yatti beya'anna, laxkala ixeba ka benne ráke deki uttibana. <sup>27</sup> Ttaka Jesús-ni nna bedaxxue ná nu kwitiha nna bechidhe na. Nu kwitiha nna beyadha ttebana bedúna.

<sup>28</sup> Iki de nuha nna uta'a Jesús-ni lhe'e ttu yo'o. Tti chi due niha sun lenbe ka benne rudhetinieha, nianna tti unnaba tisa ka benneha, ráke bie:

—¿Beakala ri'itu nna a udaatu ebeatu espíritu satsaha?

<sup>29</sup> Lee nna bekabie, ree ke:

—Luesi espíritu xxegwi-na labí kwenta eria nuná, ganna abíba innabari'i len Tata Do Yebáha [lhe ganna abíba utte ubina lhe'eri'i lhe].

*Jesús-ni redegixxi'abie attu libe deki teeki uttikane*

*(Mt. 17:22-23; Lc. 9:43-45)*

<sup>30</sup> Bedábake ata se'ekeha nna beteke daka Galilea-ni, ttaka Jesús-ni nna labí raka lebie una ka benne deki rekike niha, <sup>31</sup> kumu lee raka lebie ule'enie ka benne rudhetinieha, nianna ree ke:

—Neti benne daya yebáha utekana neti lasi ná ka nu uttikana neti, ttaka ganna chi beyonna ubisa uttiaha, la'ania nna eyaka benbaa attu libe.

<sup>32</sup> Ttaka lake nna labí rite dákane ge nu reeha nna rasibakanie innaba tisake bie.

*Gasina uni ttu benne kini ake nu loni ge adíke*

*(Mt. 18:1-5; Lc. 9:46-48)*

<sup>33</sup> Tti chi besinke lhe'esi Capernaum, atti chi se'eke lhe'e yo'oha nna unnaba tisa Jesús-ni ka benne rudhetinieha, ree ke:

—¿Bí ge nuha ridaka len luesile tti deyu'uri'i nedaha?

<sup>34</sup> Ttaka lake nna siiba ukake labí bekabike, kumu atti deyu'uke nedaha ridaka len luesike ge nuxake ankake nu ra xxeniru leni. <sup>35</sup> Nianna tti urebie nna uxie ka benne tsi'inu (12) rudhetinieha nna ree ke:

—Ganna nuxa ttúle raka lele akale nu loni delo iyále, benne ake nu loniha labí unie deki ra xxeni lebie, akalee nu ixúni iyále.

<sup>36</sup> Nianna tti bedaxxue ttu nuto bedúe nuha lagwi geke nna tti ulhenie bi'iniha nna ree ke:

<sup>37</sup> —Nuxaba benne de ria lebie neti, ganna ulabie ttu luesi nuto-ni, neti nuha rulabi benneha, nna benne ulabie netiha, laa netiga nuha rulabie, Tata kia benne udhelhe netiha, benneha nuha rulabie.

*Benne abittu rigu'u ni'e ri'i, gwa duba benneha len ri'i*

*(Lc. 9:49-50)*

<sup>38</sup> Juan-ni nna rana Jesús-ni:

—Maestru, chi bilentu ttu nubiyú reki naa rudettina lu tti rebeana ka espíritu xxegwi yu'u lati ka benne. Ttaka ri'itu nna chi besunatu kini abitturu uinna aná, kumu de labí rekina len ri'i.

<sup>39</sup> Ttaka Jesús-ni nna ree kana:

—Bittu usunale ebeana ka espíritu-na. Kumu lanú ttu benne do rudettie neti tti runie ttu milagru, delo nna eyekie innebie kia. <sup>40</sup> Kumu benne abittu rigu'u ni'e ri'i, benneha gwa dube len ri'i. <sup>41</sup> Netiru ria, nuxaba benne ganna utebie kwadiba ttu xiga inda i'iyale de ankale benne ria lele neti, de nu unieha nna gugweba Tata Do Yebáha benneha nu tse ralhe dhie.

*Jesús-ni rabie: "Gwaluyú gele ka ixú yiele uinle nu satsa"*

*(Mt. 18:6-9; Lc. 17:1-2)*

<sup>42</sup> 'Nuxaba benne ganna unie dhi yiebie ttu ka benne abittu ra xxeni leke; delába ttu ka benne ria leke neti, ganna benneha unie dhi yiebie ttu ka benneha ki uinke nu satsa, netiru ria, tserula taríane uxxigakana yienie ttu íyya ge mulinu nna udelhakane lhe'e indatooha.

<sup>43</sup> Ganna nálu-na abittuba daa siina, nnelaba ruinlu ttu bixa nu satsa lenna, tsa ttela uchú nuná, kumu tserula taríana lu esinlu ata aka benlu ttu dia liiha anka choku nálu, a laa kila esinlu len ixpa lha'a nálu ata uyúlu elha disa tsialu lo giha, delába gi nu abittuba reyola loniha nu satíaba rite loniha. <sup>44</sup> [Niha labí ratti ka bedua-na, lhe nigaba labí reyola lo giha lhe.]

<sup>45</sup> Lhe anágaba ni'alu-na ganna abittuba ridú siina, nnelaba ruinlu ttu bixa nu satsa lenna, tsa ttela uchú nuná, kumu tserula saríana lu esinlu ata aka benlu ttu dia liiha anka choku ni'alu, a laa kila esinlu len ixpa lha'a ni'alu ata uyúlu elha disa nna iru'unalu tsialu lo giha, gi nu abittu reyola loniha, nu satíaba rite loniha. <sup>46</sup> [Niha labí ratti ka bedua-na lhe nigaba labí reyola lo giha lhe.] <sup>47</sup> Anágaba ganna iyya lolu-na rixuinlu na ki ruinlu ttu nu satsa, tsa ttela ulea nuná kumu tserula taríana lu esinlu ata rinnabia Tata Do Yebáha suna len ttu lha'aba iyya lolu, a laa kila esinlu leni ixpa lha'a lolu ata uyúlu elha disaha nna iru'unalu tsialu lo giha. <sup>48</sup> Niha labí ratti ka bedua-na lhe nigaba labí reyola lo giha lhe.

<sup>49</sup> 'Kumu iyába ka benne, giha nuha uinna ki tsettike ixe ttiba ttu deti. <sup>50</sup> Deti-na tseba anka nuná, ttaka ganna deti-na itua ixe geni, la'ania nna, ¿gasina uinri'i kini eyona ixe? De nuha nna latsiru gwaluni. Elha ruin gele-na akana attiba ttu deti. Ttiba deti-na rugwena ixí ge ttu elho, aníha-ba lebi'i latsiru gwaltse'e, bittu ttilha len luesile.

## 10

*Jesús-ni rabie: "Labí dika udhá iki luesi ka benne"*

*(Mt. 19:1-12; Lc. 16:18)*

<sup>1</sup> Bedába Jesús-ni Capernaum nna diabie daka Judea, daka attu ladu ro'o yoo Jordán-ni. Nianna bedetupa tteba ixeru ka benne abi'iba kwe'ebie. Lee nna attiba chi labinie runie nna bededulo ttebe rodole'enie ka benneha ka tisa ge Tata Do Yebáha. <sup>2</sup> Nianna tti ubiga ttu chupa ka fariseo.



Sun tteba ruinkana kini ku'ukane prueba, de nuha nna unnaba tisakane, rákane:

—¿Si gwaka udhá iki ttu nubiyú nuila geni?

<sup>3</sup> Lee nna bekabie gekani ree:

—¿Bíla ra lo bia bennabi bodha'an Moisés-ni len lebi'i?

<sup>4</sup> Lakana nna bekabikana rákane:

—Lo bia bennabi bodha'an Moisés-ni, gwa rugwelhabana deki nubiyúha gwakaba ilhidhana ttu yetsi ata inná lo nuha deki gwakaba ela'ana len nuila geniha. La'ania nna gwakaba udhá ikini nuilaha.

<sup>5</sup> Jesús-ni nna ree kana:

—Moisés-ni bodha'an galábie aka aníha kumu de lebi'i labí rieninle. <sup>6</sup> Ttaka Tata Do Yebáha, ttili ure yiesi lo yu-niha, nuila lhe nubiyúba lhe benie ka benne. <sup>7</sup> De nuha nna teeki udhana nubiyúha ka tata nan geniha nna utsá nání len nuila geniha <sup>8</sup> kini akakana ttisidiba ttúba benne. Laxkala labíru ankakana chupa, sinuki ttúba benne chi akakana. <sup>9</sup> Laxkala ka nu chi beketi Tata Do Yebáha, labí dika etsila ttu benne kana.

<sup>10</sup> Tti chi se'eke lhe'e yo'oha nna bedennaba tisa ka benne rudhetiniéha bie attu libe ge nu chi unneeha. <sup>11</sup> Jesús-ni nna rabie ke:

—Ganna si ttu nubiyú udhá ikini nuila geniha nna edo lenna attu nu subi, la'ania nna satsaba nuha chi uin nubiyúha. <sup>12</sup> Lhe anágaba nuilaha, ganna si udhá ikini nubiyú geniha nna edína attu nubiyú subi, satsagaba nuha chi uin nuilaha.

*Jesús-ni rinnabe elha nabani ge ka binto  
(Mt. 19:13-15; Lc. 18:15-17)*

13 Bisingaba ka benne len ka nuto kini uxxua ná Jesús-ni ikikabi, ttaka ka benne rud-hetinieha nna rudhaka disalake ka benne cheke ka bi'iniha. 14 Tti bilani Jesús-ni ruin ka benneha aníha, nianna bituxxunie nna ree ke:

—Gwalugwelha ka binto-na itakabi len neti nna abittu usunale. Kumu ka benne ruinke tti ruin ka binto-na, luesi ka benne-na ralhake akake ka benne innabia Tata Do Yebáha ke. 15 Netiru ria, ganna ttu benne abíba unie tti runi ttu nuto ugwelhe innabia Tata Do Yebáha bie, benneha labí ake nu innabia Tata Do Yebáha.

16 Nianna tti rudaxxue ka binto-ha rilhenie kabi nna tti rixxua nee ikikabi, rinnabe elha nabani gekabi len Tata Do Yebáha.

*Ttu nubiyú tee xxatta belhiu geni unne lenna Jesús-ni*

*(Mt. 19:16-30; Lc. 18:18-30)*

17 Chiba dha Jesús-ni tsie, ttiruba nna gwexun-niba bisin ttu nubiyú nna bedú xibini arloe nna rane:

—Maestru, lu ankalu benne tse. Unáchu, ¿bíla anka nu unia kini satíaba aka bania arlo Tata Do Yebáha?

18 Jesús-ni nna bekabie geni, ree:

—¿Beaka ralu deki ankaa benne tse? Lanú ttu benne do anke benne tse, sunruba Tata Do Yebáha gwanke benne tse. 19 Lu chiba yulu nu boka'an Tata Do Yebáha uinri'i, tti ree:

Bittu akalu nu runi elhutti,  
 lhe bittu dho lenlu nu abittu anka latselalu,  
 lhe anágaba bittu lhanalu,  
 lhe bittu kwentaba usialu iki ka benne deki  
 benke ttu bixa,  
 lhe anágaba bittu kualu bixa tee ge ttu benne,

lhe tsiagaba lelu ka tata nan gelu lhe.

<sup>20</sup> Nubiyúha nna bekabina gee, rane:

—Maestru, ttili ankaa nu kwiti toha chi rudoa tisa ge iyá nu ralu-na.

<sup>21</sup> Jesús-ni nna begíabie loni nna besi'inie na, nianna tti rabie na:

—A sun tte attu nu riyasa uinlu: beyya nna betto'o iyá nu tee gelu nna belhiu ge nuha nna begwe ka benne abittu geke tee. Ganna lu uinlu aníha, la'ania nna gwattaba elha tse gelu yebáha. La'anialigaba nna chinka utá betenalha neti.

<sup>22</sup> Ttaka nubiyúha, tti biyieninna nu rabie naha, nianna si'iba bedúna leni deyyana kumu de tee xxatta geni.

<sup>23</sup> Nianna tti belanni Jesús-ni abi'iba kwe'ebie nna ree ka benne rudhetinieha:

—Gáruba tsitsi anka ki isin ka nu tee gekinna akakana benne innabia Tata Do Yebáha.

<sup>24</sup> Ka benne rudhetinieha nna bebanabakanie ge nu reeha. Jesús-ni nna redeabie ke:

—Xi'ini to, ka benne ruxxen leke ge nu tee geke, gáruba tsitsi anka ki isinke akake benne innabia Tata Do Yebáha. <sup>25</sup> Adírula satti ga'a ttu camellu lhe'e yieru do xan ttu yoxa attichula ga'a ka benne tee geke ki akake nu innabia Tata Do Yebáha.

<sup>26</sup> Ka benne rudhetinieha nna adikala rebanakanie, nianna ra luesike:

—Ganna aníha nna, ¿nú tteba dhaana esin lenna Tata Do Yebáha?

<sup>27</sup> Nianna tti belanni Jesús-ni loke nna ree ke:

—Len ka benne se'e yiesi lo yu-ni abittu galá aka, ttaka len Tata Do Yebáha iyába gwakaba.

<sup>28</sup> Pedro-ni nna udulona rane:

—Biyúruuga, ri'itu chiba bedhá ikitu iyába nu tee getu nna danalhatu lu.

<sup>29</sup> Jesús-ni nna bekabie ree:

—Netiru ria, nuxaba benne ganna bedhá ikie yo'o geeha lhe ka betsieha lhe ka daneha lhe ka tata nan geeha lhe, anágaba ganna bedhá ikie nuila geeha lhe ka xi'inieha lhe ka lo yu geeha lhe de danalhe neti, lhe de ria lebie ka tisa ge Tata Do Yebáha lhe, <sup>30</sup> benneha, nnanna doe yiesi lo yu-ni gayua (100) libe-la edíe nu bedhá ikieha, delába edíe ka yo'o lhe ka betsie lhe ka dane, lhe anágaba edíe ka tata nan gee lhe edíe ka xi'inie lhe ka lo yu gee lhe, anágaba meskila sanookane urio lákane, ttaka nu si daa nna satíaba aka benbie arlo Tata Do Yebáha. <sup>31</sup> Ttaka ixé ka nu ra xxeni lekani nnanna, la'ania nna eyakakana ka nu abittu ra xxeni lekani, nna ka nu abittu ra xxeni lekani nnanna, ka nuha-la eyakakana ka nu ra xxeni lekani la'ania.

*Jesús-ni beyonna libela rigixxi'abie deki teeki uttikane*

*(Mt. 20:17-19; Lc. 18:31-34)*

<sup>32</sup> Yu'ubake neda diake Jerusalén-ni nna daneruba Jesús-ni lo ka benne rudhetinieha. Ka benneha nna rebanabakanie lhe itú rasibakanie danalhake bie. Nianna tti bedexie sun ka benne tsi'inuha-ba (12) nna utixxi'anie ke nu satebie.

<sup>33</sup> Nianna ree ke:

—Gwaluyúruuga, chiba diari'i isinri'i Jerusalén-ni. Neti benne daya yebáha nna chiba dabigana utekana neti lasi ná ka nu loni ge ka bixxudiha lhe lasi ná ka nu rule'ekinna ka benne nu ra lo bia bennabi bodha'an Moisés-ni lhe. Ka nuha nna urixxi ukinnibakana neti kini gattia,

nianna tti uttekana neti lasi ná ka nu abittu ankakana nu Israel. <sup>34</sup> Ka nuha nna uxisikana kia lhe ukulhakana neti lhe, anágaba nna uttuttugaba xxenkani loa, nianna tti uttikana neti. Ttaka ganna chi eyonna ubisaha, la'ania nna eyaka benbaa attu libe.

*Santiago-ni lhe Juan-ni lhe rinnabake ki tse'eke gaxxa kwe'e Jesús-ni yebáha*  
(Mt. 20:20-28)

<sup>35</sup> Jacobo-ni lhe Juan-ni lhe, lakana ankakana xi'in Zebedeo-ni. Ixpabakana ubigakana ata du Jesús-ni nna rákane:

—Maestru, raka letu uinlu nu innabatu.

<sup>36</sup> Lee nna ree kana:

—¿Bí raka lele unia?

<sup>37</sup> Lakana nna rákane:

—Ugwelhachilu ri'itu kwiatu gaxxa kwe'elu ganna chi esinlu yebáha ata innabialuha, ttutu dhotu daka ná benlu nna attutu nna dhotu daka ná yattilu.

<sup>38</sup> Jesús-ni nna ree kana:

—Lebi'i labí yule nu rinnabale-na. ¿Si gwadaale uyúle luesi elha disa uyúa-ni lhe si gwadaale satele luesi nu satea-ni lhe?

<sup>39</sup> Lakana nna rákane:

—Ila. Gwadaa galátu.

Lee nna ree kana:

—Gwalí galá, gwadaabale uyúle luesi elha disa uyúa-ni lhe satele nu satea-ni lhe, <sup>40</sup> ttaka nu rale deki ugwelhaa le kwiale, ttúle daka ná bania lhe attule daka ná yattia lhe, labí neti ralhaa ugwelhaa le kwiale niha, sinuki nuná ankana ge

ka benne chi ga'anani Tata Do Yebáha kwiake kwe'a niha.

<sup>41</sup> Tti biyienini a tsii ka benne rudhetinieha nu rinnaba Jacobo-ni lhe Juan-ni lhe, nianna bisa'akanie len ka benneha. <sup>42</sup> Jesús-ni nna beyaxie ke nna ree ke:

—Lebi'i gwa yúbale, ka nu rinnabia lhe'e ka yiesi dittu-na, rinnabiabakana ka benne gekani attiba rakaba lekani lhe anágaba ka nu ra xxeni lekani se'e lhe'e ka yiesi-na, nu rábakana raka. <sup>43</sup> Ttaka lebi'i labí aná dika udhaka luesile. Lebi'i nu uinlale, ganna nuxa ttúle raka lele akale nu ra xxeni leni delo iyále, benne inná xxeni leha, benneha-la ake benne ixúni adíle, <sup>44</sup> lhe anágaba benne raka lebie ake nu loni gele, lalee ake attiba ttu nu to'o lo sina ixúe ute nábíe len iyá ttele. <sup>45</sup> Kumu anágaba neti benne daya yebáha laa dagaa yiesi lo yu-ni ki ixúti ka benne uinke nu innía, sinuki dalaa kini ixúa ute náya lenke lhe daya kini gattia kixaa ge ka tulha ruin ka benne, ki odiláya ixeke.

*Bartimeo-ni bedhali Jesús-ni ka iyya loni*

*(Mt. 20:29-34; Lc. 18:35-43)*

<sup>46</sup> Bisinba Jesús-ni lenie ka benne rudhetinieha lhe ixé juisiru ka benne lhe'esi Jericó. Tti chi deyyake eriake lhe'esiha, ro'o neda deyyakeha re ttu nubiyú a raka ilenna, rinnabana belhiu. Nubiyúha lána Bartimeo. Bartimeo-ni ankana xi'in ttu benne tee lábíe Timeo. <sup>47</sup> Tti ute den Bartimeo-ni deki Jesús ge Nazaret-niba nuha utee niha, nianna tti unnena idisa, rana:

—¡Jesús benne datia David, gwatuachi lelu neti!

48 Nianna ixeba ka benne bedhaka disake nubiyúha kini eyaka siina, ttaka lana nna adíla idisa uresi'ana, rana:

—¿Benne datia David, gwatuachi lelu neti!

49 Nianna tti uleda Jesús-ni nna udhelhe kini gwalisake na. Ka benneha nna gwaxxíke benne lo xuaha nna ráke bie:

—Tsitsi uleki lelu nna udú lii. Chi raxie lu.

50 Benneha nna bedelha bixxie larí nukueha nna gintsaba udú liie, nianna tti die ata du Jesús-ni. 51 Jesús-ni nna unnaba tise benneha, ree bie:

—¿Bí raka lelu udhaka lu?

Benne xua loeha nna ree:

—Maestru, raka lasia eyali ka iyya loa-ni.

52 Lee nna ree benneha:

—Chinka beyya. De ugía lelu deki gweyaka-balu, de nuha nna chiba beyakalu.

Looraha tteba beyali ka iyya lo benneha, nianna dia ttebe danalhe Jesús-ni.

## 11

### *Jesús-ni uta'abie lhe'esi Jerusalén-ni*

*(Mt. 21:1-11; Lc. 19:28-40; Jn. 12:12-19)*

<sup>1</sup> Tti chi isin ka Jesús-ni lhe'esi Jerusalén-ni, gaxxaba ata re lhe'esi Betfagé lhe Betania lhe, daka ata do i'yya ata daa ka ya olivuha, nianna tti udhelha Jesús-ni chupa ka benne rudhetinieha,

<sup>2</sup> ree ke:

—Gwaltsia lhe'e yiesi to re arlori'i-ni. Ganna chi uta'ale lhe'e yiesi-na nna saxxaka ttebale nalha ttu burru to, ttu nu lanú nu chi udona kwe'eni. Gwalidhasi yienni nna gwaltá lenna.

<sup>3</sup> Ganna nuxa innaba tisana le, gana le: “¿Beaka

ridhasile yien burru to-na?” Aní gwaligá na: “Jesús benne anke Xxanari'iha-ba riyasanie nuni, delola nna gwetedha'an tte gee na.”

<sup>4</sup> Nianna dia ttebake nna gwaxxakabake burru toha, nalhana ro'o nedaha, gaxxaba ro'o ttu yo'o. Nianna tti udhasike yienni.

<sup>5</sup> Ttu chupa ka nu se'e niha nna unnaba tisakana, rákana:

—¿Bíunna ruinle? ¿Beaka ridhasile yien burru to-na?

<sup>6</sup> Ka benneha nna bekabibake atti tteba ra Jesús-ni ekabike. Aníha uka nna gwa begwel-habakana ke decheke bia toha. <sup>7</sup> Tti besin lenke burru toha ata du Jesús-ni, nianna utsilake ka xokeha kwe'e bia toha nna tti udoe kwe'eba. <sup>8</sup> Ixegaba ka benne utsilake ka xokeha lo neda ata dia Jesús-ni ritebie nna adíke nna utitsake lo ka yaga daa niha nna utsilake lo nedaha. <sup>9</sup> Ka benne daneruke arloeha lhe ka benne danalhake bieha lhe, ka benneha nna ribesi'abake ráke bie: ¡Xxeniba ra lelu!

¡Karubárulu! ¡Lu ankalu benne udhelha Tata Xisiha!

<sup>10</sup> ¡Karubárulu! ¡Lu innabialu ttiba unnabia tata geri'i David-ni!

¡Xxeniba ra le Tata Do Yebáha!

<sup>11</sup> Tti uta'a Jesús-ni lhe'esi Jerusalén-ni nna dia ttebe ata do yotuha nna bilánie abi'iba kwe'e yotuha iyá nu raka niha, ttaka kumu chi galá diora nuha, de nuha nna bedá ttebe len ka benne tsi'inu rudhetinieha (12) deyyake daka Betania.

*Jesús-ni benie kini ubisi ya higuha  
(Mt. 21:18-19)*



<sup>12</sup> Beyeki sáha, tti beriake lhe'esi Betania, ugwetti bituin Jesús-ni. <sup>13</sup> Nianna tti bilánie du ttu ya higu axtaru nu reha gwa siaba lhaga geni. Lee nna dia ttebe ata du yagaha ganna gwa sia higu loni. Ttaka bi gwaxxake ni ttu higu lo nuha, sunruba lhaga geni sia, kumu labí higu chi rebia la'ania. <sup>14</sup> Nianna tti ree yagaha:

—¿Debá nnanna niruba attu higu a kwiaru lolu, laxkala lanúru nu gona nu xixxi gelu!

Ka benne rudhetinieha nna biyienbakanie nu reeha.

*Jesús-ni bochesue ka nu se'e gwetto'o lali'a yotuha*

*(Mt. 21:12-17; Lc. 19:45-48; Jn. 2:13-22)*

<sup>15</sup> Tti bisinke lhe'esi Jerusalén-ni nna uta'a tteba Jesús-ni lali'a yotuha nna udulo ttebe bochesue iyá ka nu se'e gwetto'oha lhe ka nu yu'u ugo'oha lhe. Berixxi logabe ka mexa ge ka nu rotsea belhiha lhe ka xxila ge ka nu se'e gwetto'o ka bechaha lhe. <sup>16</sup> Anágaba labíru begwelhe ka benne tteke lali'a yotuha nujake yua. <sup>17</sup> Nianna rigixxi'anie ka benneha ree ke:

—¿Laaba ganna lo ka yetsi ge Tata Do Yebáha dia ra: “Yo'o kia-ni ixúe kini iyá xea ka benne se'e yiesi lo yu-ni ilhapike tisa len neti”? Ttaka lebi'i nna ttiba “belea ata yu'u ka ubanala” chi benle yotu-ni.

<sup>18</sup> Biyienbakin ka nu loni ge ka bixxudiha lhe ka nu rule'ekinna ka benne nu ra lo bia bennabi bodha'an Moisés-ni nu ra Jesús-ni, nianna tti begila lekani kini gaxasina uinkana uttikane, kumu rasibakinna gebie kumu de iyába ka

benne rebanabakanie ge nu rule'enie keha. <sup>19</sup> Tti chi ulha sá nna beriaba Jesús-ni Jerusalén-ni lenie ka benne rudhetinieha deyyake.

*Ganna si tuttíruga tsia tsitsi leri'i ge Tata Do Yebáha, la'ania nna gwadíbari'i nu innabari'i (Mt. 21:19-22)*

<sup>20</sup> Beyeki dilaha nna dia Jesús-ni lenie ka benne rudhetinieha nna uteke gaxxaba ata du ya higuha. Nianna bilákanie yagaha, chi ubisi nuha itupa lhu-ni.

<sup>21</sup> Nianna tti gwadú le Pedro-ni nna rana Jesús-ni:

—Maestru, belanniruga ya higu utisaluha, chiba ubisina.

<sup>22</sup> Jesús-ni nna bekabie, ree kana:

—Gwaluxxen tsitsi lele ge Tata Do Yebáha.

<sup>23</sup> Netiru ria, nuxaba benne ganna ttixka gabie i'iya do naa: “Ubi'etta ata dolu-na nna ugía gwaxxudi lhe'e indatoo-na”, benne inná aníha abittu udú chupana lebie tti innee aníha, sinuki tuttíruga tsia tsitsi lebie deki gwakaba nu reeha, la'ania nna gwakaba nu rinnabehe. <sup>24</sup> Laxkala de nuha nna ria le, iyába nu innabale len Tata Do Yebáha tti rinnele lenie, gwaltsia lele deki chiba uxíle nu unnabaleha, la'ania nna gwadíbale nuha, <sup>25</sup> lhe anágaba tti se'ele rilhapile tisa len Tata Do Yebáha, gwalidhí elha xen lasi ge ttu benne ganna ritilha lenlee, kini anágaba nna Tata gele benne do yebáha gwadígabe elha xen lasi ge ka tulha ruinle. <sup>26</sup> [Kumu ganna lebi'i abíba dhile elha xen lasi ge ttu benne, anágaba

Tata gele do yebáha, labígaba dhie elha xen lasi ge ka tulha ruinle.]

*Jesús-ni rinnaba tisakane nú begwene lo neda kini runie ka nu runieha*

*(Mt. 21:23-27; Lc. 20:1-8)*

<sup>27</sup> Tti bedesinke Jerusalén-ni nna laka reki Jesús-ni ata do yotuha, nianna tti ubiga ka nu loni ge ka bixxudiha lhe ka nu rule'ekinna ka benne nu ra lo bia bennabi bodha'an Moisés-ni lhe, anágaba ubigagaba ka benneola ge ka nu Israel-ni, <sup>28</sup> nianna unnaba tisakana, rákane:

—¿Bí lo neda nuná rapalu kini ruinlu ka nu ruinlu-na? ¿Núla betena lo neda gelu kini ruinlu nuná?

<sup>29</sup> Jesús-ni nna bekabie, ree kana:

—Anágaba neti innaba tisagabaa le ttu bixa. Ganna ekabile ge nu innaba tisaa le-ni, la'ania nna neti gwagixxi'agabania le nú betena lo neda len neti kini runia ka nu runia-ni. <sup>30</sup> Gwalinná sanga, ¿nú iki biria ki begadi Juan-ni ka benne inda? ¿Si iki Tata Do Yebáha ak? ¿Iki ka benne se'e yiesi lo yu-ni ak?

<sup>31</sup> Lakana nna ra luesikani:

—Ganna gari'i na: “Tata Do Yebáha-ba udhelhe benneha”, la'ania nna innána: “¿Beaka laa a ugía lele ge benneha ganna?” <sup>32</sup> Bittugaba aka geri'i gari'i na: “Ka benneba udhelhake benneha.”

Aníha rákana kumu rasibakinna ge ka benne kumu iyábake ria leke deki Juan-ni gwalíga uka benneha profeta ge Tata Do Yebáha.

<sup>33</sup> Aníha uka nna bekabikana ge Jesús-ni, rákane:

—Labí yutu nuxa udhelhana benneha.

Lee nna bekabie gekani, ree:

—Anágaba neti bittugaba kixxi'ania le nú rutena lo neda len neti kini runia ka nu runia-ni.

## 12

*Jesús-ni rigixxi'abie ge ka nu ruin satsa riben lo yuha*

*(Mt. 21:33-46; Lc. 20:9-19)*

<sup>1</sup> Nianna tti udulo Jesús-ni utixxi'anie ka nu loni ge ka nu Israel-ni ttu tisa. Aníha benie kini utte dákana bí diani nu raka lebie kixxi'anie kana. Nianna tti ree:

—Ttu benne biyú beyade ka ya uva lo yu geeha, nianna tti bedheabie abi'iba ro'o yuha lhe ulekie ttu xieru ata idí uvaha. Anágaba nna bengabe ttu yo'o ttu nu yadha kini dho benne ulatsie ki anuttu nu salhidana uvaha. Nianna tti bete ganne yuha len ka nu kwenkana nuha, lee nna biriabie die idittu. <sup>2</sup> Atti chi bisia sá exú uvaha nna udhelhe ttu ka benne riben lo sina geeha kini tsie ata se'e ka nu riben lo yuha ki utekana nu ralhe dhie ge lo yuha. <sup>3</sup> Ttaka ka nu riben lo yu geeha bedaxxulakana benne udhelheha nna uyalakane. Nianna suna anába anke bedhelhakane. <sup>4</sup> Nianna tti bededhelhe attu benne riben lo sina geeha, ttaka lakana nna bodosíalakana benneha íyya nna ulha'akana ikie lhe besiala lekanie lhe. <sup>5</sup> Nianna tti bededhelhe attue, ttaka benneha bettilakane. Iki de nuha nna udhelharugabe ixeruke, ttaka ttu chupa ka benneha uyakana ke nna attu chupake nna bettibakana ke. <sup>6</sup> Nianna a sunruba xi'in biyúeha bexxa, benne rakanie geeha. Debá benneha

udhelhe kumu rakanie: “Xi'inia-niligaba nna gweyya lekanie.” <sup>7</sup> Ttaka ka nu riben lo yu geeha, tti bilákinna xi'in biyúeha, nianna ra luesikani: “Lana nuní eya'anna lo yu-ni. Uttiri'i na kini eya'anri'i len yu-ni.” <sup>8</sup> Nianna tti bedaxxukana benne kwitiha nna bettikane nna tti bedelhakane ro'o yu ata daa ka ya uvaha.

<sup>9</sup> Nianna tti ra Jesús-ni kana:

—¿Bí rakinle uin xxana ka ya uvaha ganna? ¿Laaba ganna tsie nna uttie ka nu riben lo yu geeha, nianna tti odotebie yuha len ka nu subi? <sup>10</sup> ¿Si lagwa chi belabale lo ka yetsi ge Tata Do Yebáha ata dia ra:

Íyya nu ulu'u ni'a ka nu rukuakana yo'oha, íyyaha-la nuha chi bisinna beyakana nu rixúru; <sup>11</sup> Tata Xisiha-ba benie kini uka aní, nna rebanabinri'i rilenri'i nu benie?

<sup>12</sup> Ka nu loni ge ka nu Israel-ni, kumu ute dábakinna deki labakana nuha betani Jesús-ni nu unneeha, de nuha nna ruinkana doelha udaxxukane, ttaka de rasikinna ge ka benne, de nuha nna labí beyaxakinna udaxxukane. Laxkala nna du bixxibe deyyakana.

*¿Si teeki kixa ka benne belhiu len César nu rinnabia ge Roma-ni?*

*(Mt. 22:15-22; Lc. 20:20-26)*

<sup>13</sup> Nianna tti udhelhakana ttu chupa ka fariseo lhe ttu chupa ka nu tákana Herodes-ni lhe, kini tsia ka nuha ata du Jesús-ni nna innaba tisakane ttu bixa kini ibixxinie bixa innábie kini aníha-chu nna tee ro'okani ukinnikane. <sup>14</sup> Ka nuha nna bisinkana, rákane:

—Maestru, gwa yúbatu deki lu rinnebalu nu ankaba gwalí, labí retabinlu ge nu inná ka benne, kumu labí rulannilu ttixa anka ka benne. Lu rule'ebinlu ka benne neda ge Tata Do Yebáha attiba ankaba geni. Gwelha unáchu, ¿si gwa ga'anaba kixari'i belhiu nu daa lori'i kixari'i len César nu rinnabia xeniha, o abittuba ak? ¿Si gwagixari'i belhuha, o abittuba ak?

<sup>15</sup> Ttaka lee nna ute da ttebanie nu rulha lekaniha, nianna tti ree kana:

—¿Beaka ruinle ki ichekua ki ibixxiti bixa innía? Nii gwalute ttu belhiu ki ugíaya loni.

<sup>16</sup> Nianna tti begwekane belhuha. Labie nna ree kana:

—¿Nú lo nuní du lo belhiu-ni lhe nú lá nuní dia xani'a nuní lhe?

Lakana nna bekabikana, rákana:

—Lá César nu rinnabia xeniha-ba nuní dia lo nuní.

<sup>17</sup> Nianna bekabi Jesús-ni, ree kana:

—Ganna aníha nna gwalugweba César-ni nu anka geni. Anágaba Tata Do Yebáha nna gwalugwegabe nu anka gebie.

Nianna bebanabakinna gebie.

*Ka saduceo-ni rinnaba tisakana Jesús-ni ganna gwalí reyaka ben ka benne chi uttiha*

*(Mt. 22:23-33; Lc. 20:27-40)*

<sup>18</sup> Nianna bisin ttu chupa ka saduceo ata du Jesús-ni. Ka nuha rákana deki labí reyaka ben ka benne chi uttiha. Nianna tti unnaba tisakane, rákane:

<sup>19</sup> —Maestru, Moisés-ni bodha'ane lo yetsi lenri'i, ree: “Ganna ttu nubiyú chi betsá nání, nianna gattina nna anúba xi'inni aka len nuila

geniha, la'ania nna teeki edí betsiniha nuila bidabiha kini anáchu nna ka xi'ini aka len nuilaha nna eyakakana ttisidiba xi'in benne chi uttiha.”

<sup>20</sup> Ttu lidú use'e gasi betsi ka nubiyú. Nu xxeniha betsába náni, ttaka uttibana nna lanú xi'inni uka len nuila geniha. <sup>21</sup> Nianna bedí nu berupaha nuila bidabiha, ttaka bedeattigaba nuha nna anúgaba xi'inkani bedeaka. Aníha-gaba gwadite nu beyonnaha. <sup>22</sup> Aníha-ba gwate iyába gasi betsikani, lanú xi'inkani uka len nuilaha. Iki de nuha nna uttigaba nuilaha. <sup>23</sup> Nnanna nna unáchu, ganna chi bisia sá eyaka ben ka benne chi uttiha, ¿núla nuila gekani eyaka nuilaha, ki iyába gasi betsikani udo lenkana nuha?

<sup>24</sup> Jesús-ni nna bekabie, ree kana:

—Lebi'i rinittibale nu gweala rale, kumu de labí yule nu ra lo ka yetsi ge Tata Do Yebáha lhe labí yule tsitsiba ra lebie lhe. <sup>25</sup> Kumu ganna chi bisia sá eyaka ben ka benne chi uttiha, la'ania nna nuila lhe nubiyú lhe labíru dina otsá ná ka benneha, nigaba uketike ka xi'inkeha kumu eyakabake attiba ka anjeli se'e yebáha. <sup>26</sup> Nu rari'i ge ka benne chi uttiha ganna gweyaka benke, nnanna kixxi'ania le: Lebi'i, ¿si lagwa chi belabale lo yetsi ben Moisés-ni ata rigixxi'e ge xxiti rite loniha? Lhe'e xxitiha nuha unne Tata Do Yebáha, ree Moisés-ni: “Neti ankaa Diosi ge Abraham-ni lhe ge Isaac-ni lhe ge Jacob-ni lhe.” <sup>27</sup> Laxkala Tata Do Yebáha labí anke Diosi ge ka benne chi uttiha, lee anke Diosi ge ka benne anka bani. De nuha nna lebi'i labí yule ge nu rale-na.

*De lo iyá ka tisa bodha'an Tata Do Yebáha, ¿nú*

*ka nuha rakaru doelha udori'i tisa geni?**(Mt. 22:34-40)*

<sup>28</sup> Ttu ka nu rule'enna ka benne nu ra lo bia bennabi bodha'an Moisés-ni tti biyieninna du Jesús-ni ridaka lanie ka saduceo-ni lhe biyieninna deki gwa bekabi tseba Jesús-ni ge ka nuha, nianna tti ubigana nna unnaba tisane, rana:

—Delo iyá ka tisa bodha'an Tata Do Yebáha uinri'i, ¿nú ka nuha dakaru?

<sup>29</sup> Jesús-ni nna bekabie geni, ree na:

—Dakaru tisa nu ra: “Lebi'i ka benne datiale Israel, gwaludo nagale. Tata Do Yebáha, ttúba benneha anke Xxanari'i, lanúru nu attu do <sup>30</sup> lhe anágaba ra: akinle ge Tata Do Yebaa benne anka Xxanaleha itú iki itú lele.” <sup>31</sup> Tisa nu berupa bodha'an Tata Do Yebáha uinri'i, nuha nna rana: “Akinle ge attu benne atti tteba rakabin gele.” Labí attu tisa tee nu dakaru bodha'ane uinri'i tti nu ra ka tisa-ni.

<sup>32</sup> Nu rule'enna ka benne nu ra lo bia bennabiha nna rana:

—Tseba bekabilu xa maestru. Gwalíbinlu ralu deki ttúba Tata Do Yebáha do, lanú nu attu do, <sup>33</sup> lhe anágaba nu ralu akinle ge Tata Do Yebáha itú iki itú lele lhe akagabinle ge ka benne atti tteba rakabin gele. Ka tisa-nila dakaru attichula ka úna lhe ka nimala ruttiri'i, ruteri'i len Tata Do Yebáha.

<sup>34</sup> Jesús-ni nna tti ute danie deki tseba bekabi nu rule'e lo bia bennabiha, nianna tti ree na:

—Lu chi tteba duna akalu benne innabia Tata Do Yebáha lu.

Debá la'ania nna lanúru nu beyaxinna innaba tisana Jesús-ni ge attu bixa.



*David-ni uke xutto Cristuha*  
(Mt. 22:41-46; Lc. 20:41-44)

<sup>35</sup> Laka du Jesús-ni lali'a yotuha rule'enie ka benne ka tisa ge Tata Do Yebáha, nianna ree ke:

—¿Galasina nna ka nu rule'ekinna ka benne nu ra lo bia bennabi bodha'an Moisés-ni nna rálakana deki David-ni ukana xutto Cristuha?

<sup>36</sup> Ki kwinaba David-ni tti yu'u Espiritu ge Tata Do Yebáha latini nna Espirituha beni kini un-nena, rana:

Tata Do Yebáha ree Cristu benne runie neti mandaduha:

“Utá udo daka ná ben kia.

Niiba dholu axtaliba ganna chi bese'a ka nu abittu raka uyúkana lu, kini ulealu ikikani.”

<sup>37</sup> Ki ganna kwinaba David-ni utixxana lá Cristuha benne runie na mandadu, ¿galasina nna uka David-ni xutto Cristuha ganna?

Ixeru ka benne rudo nagake ge Jesús-ni nna ru'uba leke ge nu rigixxi'eha.

*Jesús-ni rinnebie ge ka fariseo-ni lhe ge ka nu rule'ekana nu ra lo bia bennabiha lhe*  
(Mt. 23:1-36; Lc. 11:37-54; 20:45-47)

<sup>38</sup> Jesús-ni nna ree ka benne tti due rule'enie keha:

—Gwaluyú gele len ka nu rule'ekinna le nu ra lo bia bennabi bodha'an Moisés-ni, kumu ka nuná ru'u lekani rekikana len ka xalho ttuni lhe ru'u lekani latsiru ga ka benne kana padiuxi atti reti'ake kana lo ka neda-na, <sup>39</sup> lhe anágaba ru'ugaba lekani kwiakana lo ka xxila tseru se'e lhe'e ka yo'o ata rudhetiri'i ka tisa ge Tata Do Yebáha, lhe ru'ugaba lekani kwiakana ata anka

tseru tti riakana go yetta. <sup>40</sup> Anágaba nna riguagabakana ka yo'o ge ka nuila bidabi-na, nna ukadiba rise'ekana isá rilhapikana tisa len Tata Do Yebáha kini rudheakana lo nu ruinkanaha. Ka nuná adírula elha disa tsitsi yúkana la'ania.

*Benne nuila bidabiha betebe iyá belhiu geeha  
(Lc. 21:1-4)*

<sup>41</sup> Jesús-ni doe ttu libe lali'a yotuha gaxxaba ata sia ka nu rigu'u ka benne úna lhe'ekani nna rulannie gasina rigu'ukana belhiu. Ixe ka nu tee gekani risinkana rigu'ukana ixeni belhiu lhe'e ka nuha. <sup>42</sup> Ttaka ttu benne nuila bidabi abittu gebie tee, bisine nna ulu'e chupa ka belhiu to, ka nu lattiruba lidhakakani tee. <sup>43</sup> Jesús-ni nna uxie ka benne rudhetinieha nna ree ke:

—Netiru ria, benne nuila bidabi-ni anke benne abittu gebie tee nna xxenirula daka belhiu ulu'e attichula nu chi ulu'u iyá ka nu chi ulu'u belhiu, <sup>44</sup> kumu ka nuná ulu'ubakana belhiu nu rexxaba gekani, ttaka benne nuila-ni anke benne abittu gebie tee nna ulu'ube iyába belhiu tee gebie nu dika ixúnie ki aka banie.

## 13

*Jesús-ni rigixxi'abie deki isia sá tse'e looba yotuha*

*(Mt. 24:1-2; Lc. 21:5-6)*

<sup>1</sup> Tti bedá Jesús-ni ro'o yotuha nna ttu ka benne rudhetinieha nna ree bie:

—¡Maestru, biyúruga, anílruba anka ka íyya kua-ni lhe anílruba anka ka yo'o-ni lhe!

<sup>2</sup> Jesús-ni nna bekabie geni, ree na:

—¿Si gwa rilenlu ka yo'o xeni sia nii? Ka nuni tse'e loobakana. Niruba ttu íyya gekani laa eya'anna iki luesini; iyábakana itampabakana.

*Jesús-ni rigixxi'abie gasina aka atti lanila lhuxa yiesi lo yu-ni*

*(Mt. 24:3-35, 42-44; Lc. 21:7-36; 17:22-24)*

<sup>3</sup> Tti do Jesús-ni iki i'íya ata daa ka ya olivuha daka ata yeki lo yotuha, la'ania nna sun labe unnaba tisa Pedro-ni lhe Jacobo-ni lhe Juan-ni lhe Andrés-ni lhe, rákane:

<sup>4</sup> —Utixxi'en ri'itu, ¿nuka aka nu ralu-na lhe bí aka kini unna liina deki chi dabiga aka nu ralu-na?

<sup>5</sup> Jesús-ni nna bekabie, ree kana:

—Gwaluyú gele bittu tsia lele ge ka nu ruin lekani, <sup>6</sup> kumu ixé ka nu isia uinkana ttisidiba netiba nuha anakakana, nianna tti innákana: “Neti ankaa Cristu.” La'ania nna ixeba ka benne dhi yiekana.

<sup>7</sup> 'Atti unale deki chi yu'u ka yiesi ritilha len luesikani lhe daa tisa deki ruin ka yiesi itilha len luesikani lhe, bittu gasinle kumu teeki aka aníha. Ttaka labí chi bisia ura lhuxa yiesi lo yu-ni la'ania, <sup>8</sup> kumu ka yiesi elha-na ebi'i noo luesikani ttilhakana lhe ka nu rinnabia-na ebi'i noogaba luesikani, lhe anágaba gattibani yiesi lo yu-ni ixú lhe isiagaba ubina lhe. La'ania nna si dhuloruba ka benne uyúke elha disa.

<sup>9</sup> 'Lebi'i nna gwaluyúla gele, kumu teeki taga'akana le lo ka uxtisi lhe ukulhagabakana le lhe'e ka yo'o ata rudhetiri'i ka tisa ge Tata Do Yebáha lhe axtala arlo ka nu rinnabia xeni tatso dúkana le delo ni'a kia, kini aníha nna lebi'i

kixxi'enle kana kia. <sup>10</sup> Ttaka atti lanila lhuxa yiesi lo yu-ni, teeki chadhi ka tisa ge Tata Do Yebáha lhe'e iyába ka yiesi se'e itúba yiesi lo yu-ni. <sup>11</sup> Tti udaxxukana le nna saga'akana le arlo ka uxtisiha, abittu uchacha ikile bixa innále looraha. Suna gwalekabiba tisa ute Espíritu ge Tata Do Yebáha len lebi'i, kumu laa lebi'iga nuha innele, Espírituha-ba nuha inne. <sup>12</sup> La'ania eyeki ka benne ebi'i noo luesike. Ka nu raka betsikaniha utekana ka betsikaniha lasi ná ka nu uttikana ka nuha, lhe aníha-gaba uin ka xxudiha len ka xi'inkaniha. Ka xi'inkaniha nna eyekikana ebi'i nookana ka xxudikaniha nna uinkana kini gatti ka benneha. <sup>13</sup> Lebi'i nna iyába ka benne utía di lekani le delo ni'a ge ria lele neti. Ttaka benne dhaabie dhu tsitsie lo neda kia axtaliba ganna chi uluxa iyá nu akaha, benneha gwalábe.

<sup>14</sup> 'Ttaka lebi'i isia sá ganna chi ilenle aka ttu nu tuttíruga satsa ata labí dina akana, delába ge nu satsa utixxi'a profeta Daniel-ni. (Ata rulabale ka tisa-ni, gwalutte da nu rákana.) Ganna chi ilenle aka nu satsaha, la'ania nna ka nu se'e daka Judea-ni teeki uxunnikana tsapikana iki ka i'iya sia niha, <sup>15</sup> nna nu dona iki yo'o geniha abittu eyadina, lhe nigaba eta'ana lhe'e yo'oha saleana ttu bixa, <sup>16</sup> lhe nu dia lhe'exxiha bittu eyyana lhe'e yo'o geniha saxxína jabana geniha. <sup>17</sup> ¡Gwalíchiru le ka benne nuila ata nuja xi'inke la'ania, lhe denke ka nuto rasi lhe! <sup>18</sup> Gwalinnaba len Tata Do Yebáha ki abittu aka nuní tti raka idilhaha, <sup>19</sup> kumu elha disa tsitsi nuha uyú ka benne lhe'e ka sáha, ttu elha disa nu labí chi uka itú uleki Tata Do Yebáha yiesi lo yu-ni, la'anialiba nna aka nuha lhe nigaba labíru

aka luesi elha disaha nu si daa lhe. <sup>20</sup> Kumu Tata Do Yebáha, ganna ttixka abíba odatsie ka sáha, la'ania nna niru ttú benne labí lhaabie, iyábake gattike. Ttaka lee odatsie ka sáha kumu de rakanie ge ka benne chi bekwebie.

<sup>21</sup> 'Ganna nuxa gana le la'ania: "Gwalulan-niruga, ne benne anka Cristuha du nii", o si innána: "Gwalugíaruga, ne bie du naa", abittu tsia lele ge nu inná aníha. <sup>22</sup> Kumu isia ka nu labí gwalí ankakana Cristu lhe isia ka nu labí gwalí ankakana profeta ge Tata Do Yebáha nna uinkana ka milagru lhe uinkana ttu bixa nu dika ebanani ka benne geni. Aníha uinkana kini dhi yiekana ke. Gaxa axtala ka benne chi bekwe Tata Do Yebáha ki akake gebie, axtala ka benneha dhi yiekana ki tsia leke gekani. <sup>23</sup> Laxkala lebi'i gwaluyú gele. Nnannali chi rigixxi'ania le iyá nu aka la'ania.

<sup>24</sup> 'Iki de chi ute ka sá tti uyú ka benne elha disaha, la'ania nna echulha lo tatubisa-na nna nanto beo-na nna labíru ku'ubie xiani. <sup>25</sup> Ka beli sia gwetsáha nna iginnibakana lo yu lhe adíru ka nu ra xxeni lekani se'e gwetsáha igubigabakana. <sup>26</sup> La'ania nna neti benne daya yebáha, iláni ka benne neti dedáya yebáha lhe'e beaha ra tsitsi lasia lhe raka lhalhaba xiani kia lhe. <sup>27</sup> Nianna tti idhelhaa ka anjeli kiahá itú tte yiesi lo yu-ni, axtaba ata riluxa yebáha lhe axtaba ata riluxa yiesi lo yu-ni lhe. Idhelhaa ke kini tsiake ottupake ka benne chi bekwe Tata Do Yebáha.

<sup>28</sup> 'Gwalutte dáruga ge ya higuha. Nuha ganna chi renettu ka lo nání lhe reria ka lhaga geni lhe, la'ania nna chi yule deki chiba dabigana

eta'a iyya. <sup>29</sup> Anágaba lebi'i ganna chi ilenle aka nu chi ria-ni, la'ania nna chi yule deki chi tteba dabiga esiaya. <sup>30</sup> Netiru ria, atti isia sá aka iyá ka nuni, ka benne se'e nnanna labí chi uttike la'ania. <sup>31</sup> Yebáha lhe yiesi lo yu-ni tse'e loobakana, ttaka ka tisa chi ria-ni teekiba aka nu ra ka benne-ni.

<sup>32</sup> 'Ttaka la sá lhe la ura aka nuha, lanú nu yuna, ni ka anjeli ge Tata Do Yebáha yuke lhe nigaba neti benne ankaa Xi'inieha a yua, sunruba Tataha yue.

<sup>33</sup> 'De nuha nna gwaltse'e tsitsi lhe gwaltse'e ubeda lhe [gwalinne len Tata Do Yebáha lhe] kumu lebi'i labí yule nukaxa aka nuha. <sup>34</sup> Gwaluni attiba beni ttu benne birie die idittu nna bedha'ane yo'o geeha len ka nu reni lo sina geeha. Ttu ttu ka nuha begwebie kana sina ralhakana uinkana, nna nu ridú ridhalina lhe rodheana ro'o yo'oha nna ree nuha: "Ulanni tsitsilu ro'o yo'o kia-ni kini anuttu nu ga'a." <sup>35</sup> Laxkala lebi'i gwaltse'e ubeda kumu labí yule nukaxa esia xxana yo'oha, si esie chi dia ralha o esie riluela, o esie atti chi ribesi ka chinka-na lhe o si esie tti chi daa tsani lhe, <sup>36</sup> kini ni kina ttu nnelaba esie nna etexxake le te'adhile. <sup>37</sup> Nu xpeya le-ni, nunígaba upeya iyá ka benne: ¡Gwaltse'e tenná!

## 14

*Ka nu loni ge ka benne Israel-ni regila lekani gaxasina udaxxukana Jesús-ni  
(Mt. 26:1-5; Lc. 22:1-2; Jn. 11:45-53)*

<sup>1</sup> A chupa ubisaba riyasa isia laní Pascua tti ro ka benne Israel-ni yettaxtila nu abittu kua dii sela lhe'eni. Ka nu loni ge ka bixxudiha lhe ka nu rule'ekinna ka benne nu ra lo bia bennabi bodha'an Moisés-ni, ka nuha regila lekani bixa ibixxini Jesús-ni innee kini aníha-chu nna tee ro'okani udaxxukane nna uttikane. <sup>2</sup> Ttaka lakana nna ra luesikani:

—Bittu uinri'i nuha tti raka laníha kini ka utsatsari'i ka benne.

*Ttu nuila bedona seti nu rure ixixxi iki Jesús-ni (Mt. 26:6-13; Jn. 12:1-8)*

<sup>3</sup> Jesús-ni doe lhe'esi Betania lhe'e lisi Simón nu uka latini yiesu nu tee lání lepra. Tti doe go yettaha bisin ttu nuila denna ttu re'e to ankana ge íyya ragalha. Íyya ragalhaha tee lání alabastro. Lhe'e re'e toha ta'a seti nu rure ixixxi nu raka xxatta yaxi. Setiha ankana taga'a ge ttu yaga tee lání nardo. Nuilaha nna ulha'ana re'e toha nna bedo ttattana seti ta'a lhe'e nuha iki Jesús-ni. <sup>4</sup> Ttu chupa ka nu se'e niha, nna bisa'akinna nna ra luesikani:

—¿Beaka kwentaba bedelha lattibana seti-na?

<sup>5</sup> A bito'ochila nuná gwate tsunna gayua (300) denario. Belhuha nna dhi ka benne dii ata abittu tee geke.

Nianna rinnekana ge nuilaha.

<sup>6</sup> Jesús-ni nna ree kana:

—Naa la rena. Bittu innele geni, kumu ttu nu tse nuní chi benna len neti. <sup>7</sup> Ka benne dii abittu geke tee satíaba tse'e ka benne-na len lebi'i nna gwakaba gele ute nále len ka benne-na tti aka lele, ttaka neti labí satía dhoa len lebi'i. <sup>8</sup> Nuila-ni benba nuní nu ukaba geni; chi begu'u gaana

seti rure ixixxi-ni latia kini igatsia ganna chi uttiaha. <sup>9</sup> Netiru ria, itúba yiesi lo yu-ni gaxaba lhe'e ka yiesi ata kixxi'a ka benne ka tisa kia-ni, kixxi'agabake ge nuila-ni. Aníha kini sadú le ka benne ge nu benna-ni.

*Judas-ni betena Jesús-ni lasi ná ka nu uttikane  
(Mt. 26:14-16; Lc. 22:3-6)*

<sup>10</sup> Judas Iscariote, ttu ka benne tsi'inu rudhetini Jesús-ni (12), ugiana gwanne lenna ka nu loni ge ka bixxudiha kini utena Jesús-ni lasi nákani. <sup>11</sup> Lakana nna bedekabakinna ge nu rana kanaha, nianna bisia ro'okani ugwekana na belhiu. Lana nna udulo ttebana begila leni ki gaxasina utena Jesús-ni lasi nákani.

*Jesús-ni roe len ka benne rudhetinieha irse ge  
laní Pascua  
(Mt. 26:17-29; Lc. 22:7-23; Jn. 13:21-30; 1 Co.  
11:23-26)*

<sup>12</sup> Sá neru ge laní Pascua tti ro ka benne Israel-ni yettaxtila nu abittu kua dii dia ikiniha lhe la'aniagaba nuha ruttike ka neru re'eni to roke laníha, nianna tti unnaba tisa ka benne rudhetini Jesús-ni, ráke bie:

—¿Gá raka lelu tsiatu sentu irse ki gori'i laní Pascua-ni?

<sup>13</sup> Lee nna udhelhe chupa ka benne rudhetinieha nna ree ke:

—Gwaltsia lhe'e yiesi-na. Naa eti'ale ttu nu-biyú dedána denojana ttu re'e inda nna gwaltsia gwasanalha na. <sup>14</sup> Ata eta'anaha, niha gwaligasi xxana yo'oha: “Aní ra maestruha: ¿Gon-na



do ttu quartu ata go irse lania ka benne rudhetinia-ni irse ge laní Pascua?" <sup>15</sup> Xxana yo'oha nna ule'enna le yo'o nu do berupa kuaha. Niha chi do tse ttu quartu xeni. Lhe'e nuha gwaluin irse ki gori'i.

<sup>16</sup> Ka benne rudhetinieha nna dia ttebake uta'ake lhe'esiha nna gwaxxakabake iyába atti tteba chi ree keha. Niha benke irse ge laní Pascua.

<sup>17</sup> Tti chi ralhaha nna bisin Jesús-ni len ka benne tsi'inu rudhetinieha (12). <sup>18</sup> Tti chi se'eke ro'o mexaha go irse, nianna tti ree:

—Netiru ria, delo iyále se'ele go len neti ro'o mexa-ni nuxa ttúle nuní utele neti lasi ná ka nu uttikana neti.

<sup>19</sup> Lake nna bedú si'i ttebana leke nna ttu ttubake unnaba tisake Jesús-ni, ráke:

—¿Si bittuba neti nuná xa tata?

<sup>20</sup> Lee nna bekabie, ree ke:

—Delo iyá tsi'inule (12) se'ele nii, ttúle nu rugutule lhe'e ttúba ye'ena-ni len neti, lana nuha utena neti lasi ná ka nu uttikana netiha. <sup>21</sup> Neti benne daya yebáha eya'abaa attiba chi ga'anna lo ka yetsí ge Tata Do Yebáha. Ttaka gwalíchiru le nu utena neti lasi ná ka nu uttikana neti. Tserula sariána na ganna abittu ulina, a laa kila ulina.

<sup>22</sup> Laka se'eke goha nna bedaxxu Jesús-ni yettaxtilaha nna begwebie Tata Do Yebáha ixkixaru. Nianna tti ulha'abie lhe'e benneha nna begwebie ka benne rudhetinieha nna ree ke:

—Gwaligo yettaxtila-ni. Benne-ni anke bela latia.

<sup>23</sup> Iki de nuha nna tti bedaxxue xiga ta'a vinuha nna begwebie ixkixaru Tata Do Yebáha, nianna

tti begwebie ka benneha nna iyábake u'uyake vinuha. <sup>24</sup> Nianna tti ree ke:

—Nuní ankana reni kia rugwena lidhaka tisa chi bodha'an Tata Do Yebáha len ka benne. Reni-ni ilalina kini odilána ixé ka benne. <sup>25</sup> Netiru ria, debá nnannaba ri'iya vinu-ni, labíru i'iyaa na, gannaliba chi besinaa ata rinnabia Tata Do Yebáha, la'anieliba nna ede'eyaa vinu kubi attu libe.

<sup>26</sup> Iki de chi bilhake ttu le'a to, nianna tti biriake diake iki i'iya ata daa ka ya olivuha.

*Jesús-ni rigixxi'abie deki Pedro-ni labí dhi ro'oni deki ankabienne*

*(Mt. 26:31-35; Lc. 22:31-34; Jn. 13:36-38)*

<sup>27</sup> Tti chi se'eke iki i'iyaha, nianna ra Jesús-ni ka benne rudhetinieha:

—Nnolha iyábale isatsale udhá ikile neti. Akaba attiba chi unne Tata Do Yebáha lo ka yetsi geeha, tti ree: “Neti uttibaa nu reki lo ka neruha nna ka neruha nna isatsa ttebakana.”

<sup>28</sup> Rágaba Jesús-ni:

—Ttaka iki de chi beyaka bania lo elhuttiha, la'ania nna eya'a gaaya enerua lole esinaa daka Galilea-ni, delola nna esiale.

<sup>29</sup> Pedro-ni nna rane:

—Meskiba adí ka nuní udhá ikikani lu, neti labí udhá ikia lu.

<sup>30</sup> Jesús-ni nna rabie na:

—Netiru ria, nnolha tti lanila kwesi chinkaha chupa libe, lu tsunna libela chi bedhea lelu abittu ridí ro'olu deki ankabienlu neti.

<sup>31</sup> Ttaka Pedro-ni nna ttu dúbana rana:

—Meskiba gattia lenlu, labí innía deki labí ankabiati lu.

Aníha-gaba ra adí ka benneha.

*Jesús-ni rilhapie tisa len Tata Do Yebáha Getsemaní-ni*

*(Mt. 26:36-46; Lc. 22:39-46)*

<sup>32</sup> Nianna dia Jesús-ni len ka benne rud-hetinieha ttu latti ata tee láni Getsemaní, nianna ree ka benneha:

—Nii gwaltse'e, laka neti tanne lania Tata Do Yebáha.

<sup>33</sup> Chebe Pedro-ni lhe Jacobo-ni lhe Juan-ni lhe, nianna tti uduloe bedú si'ina lebie lhe bedú xxattane lhe. <sup>34</sup> Nianna tti ree kana:

—Yalhá si'i du lasia. Gwanalu chiba gattia rakati. Nii gwaltse'e nna bittu ga'adhile.

<sup>35</sup> Lee nna biru'une attu latti daka aná nna bedú xibie bere loe lo yu, nianna tti unnabe len Tata Do Yebáha kini gaa godilábe bie lo nu sateeha. <sup>36</sup> Nianna ree:

—Tata to kia, nu diru innálu, benchi kini abittu uyúá elha disa-ni, kumu lu gwakaba gelu uinlu iyá. Ttaka labí nu innía aka, sinuki nu innába kwinalu aka.

<sup>37</sup> Tti beyekie ata se'e ka benne tsunnaha nna gwaxxake ke te'adhilake. Nianna tti ree Pedro-ni:

—Simón Pedro, ¿si te'adhibalu? ¿Si bi gwa udaalu dho tennálu kwadiba ttu ura?

<sup>38</sup> Gwaltse'e tenná lhe gwalinnaba len Tata Do Yebáha kini abittu dhi yie nu xxegwiha le nna eyadi gaale. Gwalí galá, lebi'i gwa rakabinle tse'e tennále, ttaka bela latile-na labí ridaana uchíana.

<sup>39</sup> Nianna tti bedeyekie attu libe nna gwadinne lenbie Tata Do Yebáha, bodeki adakabe ka tisa

nu chi ree benneha. <sup>40</sup> Tti bedeyekie besine ata se'e ka benneha attu libe nna gwadixxakagabe ke dedete'adhigabake kumu de ta'a xxatta loke bisiela nna abígaba yuke bixa ekabike gebie.

<sup>41</sup> Tti beyekie besine ata se'e ka benneha nu beyonna libeha, nianna tti redeabie ke:

—¿Si sa tebale te'adhile? ¡Ttanába! Chinka gwaleyadha, kumu neti benne daya yebáha chiba bisia ura nuní utekana neti lasi ná ka nu runi tulha. <sup>42</sup> ¡Chinka gwaleyadha nna gwaleyaa! ¡Ne nu utena neti lasi ná ka nu uttikana netiha, chi daa naa!

*Bedaxxukana Jesús-ni kini uttikane*

(Mt. 26:47-56; Lc. 22:47-53; Jn. 18:2-11)

<sup>43</sup> Sa dula Jesús-ni gwenne, ttiru chi bisin Judas nu selana lhe'e ka benne tsi'inu (12) rudhetinieha, dia lenna ixé ka nu denkana yaga lhe espada lhe. Ka nuha udhelha ka nu loni ge ka bixxudiha lhe ka nu rule'ekinna ka benne nu ra lo bia bennabi bodha'an Moisés-ni lhe, anágaba diagaba ka benneola ge ka nu Israel-ni. <sup>44</sup> Judas nu utena Jesús-ni lasi ná ka nu udaxxukaneha nna chi rana ka nuha:

—Nu ibigaa goa xxaganiha, lana nuha. Gwaludaxxu na nna gwaluxxika na kini abittu elána.

<sup>45</sup> Aníoka nna tti bisin Judas-ni ata du Jesús-ni nna tti ubigana nna rane:

—Maestru.

Nianna tti utona xxage. <sup>46</sup> Ka nuha nna bedaxxu ttebakane nna dechekane. <sup>47</sup> Ttaka ttu ka benne du len Jesús-ni nna ulea ttebe espada geeha nna uchúe naga nu riben lo sina ge bixxudi xeniha. <sup>48</sup> Nianna ra Jesús-ni kana:

—¿Beaka ttiba nu daa gwedaxxu ubana dale gwedaxxu neti denle espada lhe yaga lhe? <sup>49</sup> Ki ttu ttu sába dua len lebi'i rule'enia le ka tisa ro'o yotu-na nna abí chiga bedaxxule neti. Ttaka teeki aka aní kini saxxína nu ra lo ka yetsi ge Tata Do Yebáha.

<sup>50</sup> Looraha nna iyába ka benne rudhetinieha ttúbe bedúke nna bexunnilake. <sup>51</sup> Sunruba ttu nu kwiti diana danalhana Jesús-ni, nukuna ttu lari nna lariha-ba biyaxxukinna. <sup>52</sup> Ttaka lana nna belhá bixxina lari nukunaha nna tuntubana bexunnina.

*Jesús-ni biso due arlo ka uxtisi ge ka nu Israel-ni*

*(Mt. 26:57-68; Lc. 22:54-55, 63-71; Jn. 18:12-14, 19-24)*

<sup>53</sup> Nianna bisin lenkana Jesús-ni arlo bixxudi xeniha nna betupa tteba iyába ka nu loni ge ka bixxudiha lhe ka benneola ge ka nu Israel-ni lhe anágaba ka nu rule'ekinna ka benne nu ra lo bia bennabi bodha'an Moisés-ni lhe. <sup>54</sup> Pedro-ni nna idittuliba danalhana Jesús-ni bisinna lali'a yo'o ata do bixxudi xeniha, nna niha-ba urena len ka nu rise'e gweyú ro'o lisi bixxudi xeniha rutsa'ana ro'o tee.

<sup>55</sup> Ka nu loni ge ka bixxudiha lhe iyába ka nu runi elhuxtisi ge ka nu Israel-ni, yu'ukana regila lekani bixa usiakana iki Jesús-ni kini anáchu tee ro'okani uttikane, ttaka labí raxxakakana ttu bixa. <sup>56</sup> Kumu ixé ka nu ruin lekani rusiakana ikie, rákana deki runie ttu bixa, ttaka labí turo'o raxxína nu rinnekanaha. <sup>57</sup> Ttu chupakana udú liikana nna rusiakana ikie nu labí lii nna rákana:

58 —Ri'itu biyienintu rana: “Neti uttampaa yotu-ni, yotu nu ben ka benne se'e yiesi lo yu-ni. Nianna delo tsunna ubisaba nna chi elhidhaa attu yotu nu labí uin ka benne se'e yiesi lo yu-ni.”

59 Ttaka nigaba aníha nna labí raxxína turo'o len nu rinnekanaha.

60 Nianna tti udú lii bixxudi xeniha lagwi ge ka benne tupa niha nna rana Jesús-ni:

—¿Bíunni rusia ka nuní ikilu? ¿Si lagwa gwekabilu ge nu rákana-ni?

61 Ttaka Jesús-ni siiba uke, labí bekabie geni. Nianna tti bedennaba tisa bixxudi xeniha bie attu libe, rane:

—¿Si lu ankalu Cristu Xi'in benne anke le'aha?

62 Lee nna bekabie geni, ree:

—Ila, neti galá. Lebi'i gwalábinle neti benne daya yebáha dhoo daka ná bani ge benne ra tsitsi xxatta leeha lhe ilágabinle neti dedáya yebáha lhe'e bea.

63 Tti biyienin bixxudi xeniha nu ra Jesús-ni nna ucheda bixxiba xoni kini ula'a deki rise'enna, nianna tti rana:

—Nuruala riyasinri'i nuxa kixxi'ana bixa ben nuní. 64 Ki kwinaba lebi'i chi biyienin nagale rorexxa gaalana Tata Do Yebáha. Lebi'i nna, ¿bí rakinle?

Nianna iyábakana beda'a ro'okani rákana deki ralhaba Jesús-ni gattie.

65 Attu chupakana nna udulokana bettuttu xxenkani lo Jesús-ni lhe bettokana loe lhe rudhenkane lhe. Nianna tti rákane:

—Unne ya'achu, ¿núnni rudhenna lu?

Lhe anágaba ka nu rise'e gweyú ro'o yotuha ribeagabakana gi ro'e.

*Pedro-ni labí ridí ro'oni deki ankabienna Jesús-ni*

(Mt. 26:69-75; Lc. 22:55-62; Jn. 18:15-18, 25-27)

<sup>66</sup> Pedro-ni nna duna rre lali'a yo'o ge bixxudi xeniha, nianna tti ute ttu ka nuila riben sina lhe'e yo'oha, <sup>67</sup> nna tti bilen nuha Pedro-ni dona kwe'e giha rutsa'ana, nianna belanni tseaxabana loni nna tti rana na:

—Iyágabalu danalhalu Jesús ge Nazaret-ni.

<sup>68</sup> Pedro-ni nna labí uxí ro'oni nna rálana nuilaha:

—Deloxa, labí yua bí ge nuná rinnelu.

Nianna tti deyya Pedro-ni eriana ro'o yo'oha [nna uresi tteba chinkaha].

<sup>69</sup> Tti bedeláni nuilaha na attu libe, nianna redeana ka nu se'e niha:

—Nubiyú du nii, ttu ka nu danalhakana Jesús-niba nuní.

<sup>70</sup> Ttaka lana nna attu libe, labí bededí ro'oni. Nianna attu sattiruba nna ka nu se'e niha nna redeakana Pedro-ni:

—Gwalíba lu ankalu ttu ka nu selalu nuná, kumu lu ankalu ge Galilea.

<sup>71</sup> Lana nna rana:

—Gwalígatixa, labí ankabiati nubiyú rale-na. Tata Do Yebáha ugwebie neti elha disa ganna abíba liiti.

<sup>72</sup> Looraha nna bedebesi chinkaha attu libe. Nianna tti gwadú le Pedro-ni nu ra Jesús-ni na tti ree na: “Lanila kwesi chinkaha chupa libe, lu beyonna libela chi bedhea lelu abittu ridí ro'olu deki ankabienlu neti.” Nianna tti uresi tteba Pedro-ni.

# 15

## *Jesús-ni biso due arlo Pilato-ni*

(Mt. 27:1-2, 11-14; Lc. 23:1-5; Jn. 18:28-38)

<sup>1</sup> Dila tteba bitupa ka nu loni ge ka bixxudiha lhe ka benneola ge ka nu Israel-ni lhe, anágaba ka nu rule'ekinna ka benne nu ra lo bia bennabi bodha'an Moisés-ni lhe adíru ka nu ruinkana el-huxtisi gekaniha lhe, nianna beda'a ro'okani nna bexxigakana Jesús-ni nna chekane gwaga'akane lo Pilato-ni. <sup>2</sup> Pilato-ni nna unnaba tisane, rane:

—¿Si lu nuní ankalu nu rinnabia ge ka benne Israel-ni?

Labie nna bekabie geni, ree na:

—Luba chi ra deki nuná ankaa xa.

<sup>3</sup> Kumu ka nu loni ge ka bixxudiha ixeba nu rusiakana ikie, <sup>4</sup> de nuha nna bedennaba tisa Pilato-nie attu libe, rane:

—¿Si lagwa gwekabilu? Biyúruga ixeba nu rusia ka nuní ikilu.

<sup>5</sup> Ttaka Jesús-ni nna labí bekabie geni. De nuha nna Pilato-ni rugía ya'abana de labí rekabie.

## *Beda'a ro'okani uttikana Jesús-ni*

(Mt. 27:15-31; Lc. 23:13-25; Jn. 18:38-19:16)

<sup>6</sup> Kua risiaba laní Pascua rodilaa Pilato-ni ttu ka nu tee lisiyya. Nu rakaba le ka benne olhána. <sup>7</sup> La'aniagaba tee ttu nubiyú lisiyya lána Barrabás. Tena lisiyya len adí ka luesini. Lakana bese'e disakana lo ka uxtisi nna benkana elhutti.

<sup>8</sup> Nianna ixeru ka benne bisinke ata do Pilato-ni nna unnabake lenna kini odilána ttu nu tee lhe'e lisiyya attiba labinna ruinna ttu ttu ida. <sup>9</sup> Nianna tti bekabi Pilato-ni gekani, rana kana:



—Lebi'i benne Israel, ¿si gwa raka lele odiláya nu rinnabia gele-ni?

<sup>10</sup> Aníha ra Pilato-ni kumu rite dábinna deki ka nu loni ge ka bixxudiha, de ritisibakinna Jesús-ni nna gwaga'akane loni. <sup>11-12</sup> Nianna tti redea Pilato-ni kana attu libe:

—Nianna, ¿bí raka lele udhaka nu tenle lání nu rinnabia gele?

<sup>13</sup> Lakana nna ribesi'akana idisa, rákana:

—¡Betá nuná lo ya kurusi!

<sup>14</sup> Ttaka Pilato-ni nna rana kana:

—¿Beaka? ¿Bí nu satsa ben nuni?

Ttaka lakana nna adíla idisa ribesi'akana, rákana:

—¡Betá nuná lo ya kurusi!

<sup>15</sup> Ttaka Pilato-ni, de ruinna kini eya'an tsena len ka benne, aníoka nna bolhána Barrabás-ni beria nuha lisiyya. Nianna tti udhelha Pilato-ni bekuhakana Jesús-ni. Iki de nuha nna botene lasi nákanani kini utákane lo ya kurusi.

<sup>16</sup> Nianna che ka soldaduha bie lali'a guskadu ata do nu rinnabia ge Roma-ni. Niha bot-tupakana iyá xea ka soldaduha <sup>17</sup> nna tti be-gukukane ttu lari xiná chulha. Nianna benkana ttu corona yetsi nna ulu'ukana ikie <sup>18</sup> nna udulo ttebakana delo tisaba rinnekana idisa, rákane:

—¡Xxeni ra lelu xa nu rinnabia ge ka nu Israel!

<sup>19</sup> Nianna tti riginkana ikie len ttu vara ge nu rinnabia lhe ruttuttu xxenkani loe nna tti riyettakana rudú xibikani arloe. <sup>20</sup> Iki de chi bedhaka xiikaneha, nianna tti bebeakana latie lari xináha nna bogukukane ka xoeha, nianna tti uleakane ki utákane lo ya kurusiha.

*Jesús-ni betákane lo ya kurusiha*  
(Mt. 27:32-44; Lc. 23:26-43; Jn. 19:17-27)

<sup>21</sup> Ka soldaduha nujakinna Jesús-ni ya kurusiha. Lo neda dia lenkaneha, niha beti'akana Simón ge lhe'esi Cirene, xxudi ka Alejandro-ni lhe Rufo-ni lhe. Benneha dedábie ugíe lhe'exxi. Nianna bedo doelha ka soldaduha bie kini uje kurusi ge Jesús-ni. <sup>22</sup> Nianna tti dia lenkana Jesús-ni nna bisin lenkane ttu latti ata tee lání Gólgota. (“Gólgota” dienna innána: Bega Iki Nu Yatti.) <sup>23</sup> Niha begwekane vinu chixxina nu xixxi tee lání mirra, ttaka lee nna labí uka lebie i'ye vinuha. <sup>24</sup> Nianna tti betákane lo ya kurusiha. Ka soldaduha nna bedelhakana suerti kini elha'akana ka xo Jesús-ni kini ula'ana nú ka xoeha eche ttu ttukana.

<sup>25</sup> Retin jaa dila nuha betákane lo ya kurusiha. <sup>26</sup> Nianna tti betákana ttu breta xekie ata rigixxi'a bí lo ni'a ge betákane lo ya kurusiha. Lo bretaha dia ra: “Nuní ankana nu rinnabia ge ka benne Israel.” <sup>27</sup> Betágabakana a chupa ka nubiyú lo ka ya kurusi. Ka nuha benkana ubana. Ttúna betákana daka ná banie nna attuna nna betákana daka ná yattie. <sup>28</sup> [Aníha ki gwado tisa ge nu ra lo ka yetsi ge Tata Do Yebáha, ata dia ra: “Betselabakane len ka nu ruin tulhaha.”]

<sup>29</sup> Ka nu rite ata taabieha nna ruttába ikikani rulisa xxattakane, rákana:

—¡Kaxa! ¡Lu ralu deki ottampalu yotu-na nna delo tsunna ubisaba chi elhidhalu na! <sup>30</sup> ¡Ganna gwalíginlu nna titúbalu benchu ki lhaalú lo ya kurusi-na nna beyadichu!

<sup>31</sup> Aníha-gaba ruin ka nu loni ge ka bixxudiha lhe ka nu rule'ekinna ka benne nu ra lo bia

bennabi bodha'an Moisés-ni, rulisa xiikane nna ra luesikani:

—Ki ka benne subi gwa bodilána, ttaka lana nna a raka geni lhaa titúbana lo ya kurusi-na. <sup>32</sup> ;Ki rana deki ankana Cristu nu rinnabia ge ka benne Israel-ni, gwelha eyadichuna ki ilenri'i, kini anáchu nna ri'i tsia lerí'i!

Anágaba axtagaba ka nu taa len Jesús-ni lo ka ya kurusiha rulisagabakane.

*Jesús-ni uxíbie elhutti lo ya kurusiha*

*(Mt. 27:45-56; Lc. 23:44-49; Jn. 19:28-30)*

<sup>33</sup> Tti chi begwena retin tsi'inuha (12) itúba yiesi lo yu-ni bechulha nna axtaliba retin tsunaha beyani. <sup>34</sup> La uraha-gaba nna uresi'a Jesús-ni itú lebie, ree:

—Eloi, Eloi, ¿lama sabactani? —Tisa-ni dienna innána: Tata Do Yebaa kia, Tata Do Yebaa kia, ¿beaka rudhá ikilu neti?

<sup>35</sup> Adí ka nu se'e niha, tti biyienkinna nu unneeha, nianna ra luesikani:

—Gwaludoruga nagale, chi raxina profeta Elías-ni.

<sup>36</sup> Nianna tti biresu tteba ttu nubiyú du niha gwaxxína ttu xunu nna bodibidhana nuha len vinu idí, nna tti bexxikana nuha lo ttu iyyaxtila nna bedona nuha ro'o Jesús-ni ki i'ye. Nianna rana:

—Naa la taana. Ulannichuri'i si gwita Elías-ni echidana na lo ya kurusi-na.

<sup>37</sup> Jesús-ni nna uresi'e idisa, nianna utti ttebe.

<sup>38</sup> Looraha nna bireda lari daa lhe'e yotuha, chubaa tí uka nuha biredana. Udulo xekini nna axtaba xani'ani bireda. <sup>39</sup> Soldadu nu baninna

ttu gayua (100) ka soldadu ge Roma-ni, nuha duna gaxxaba arlo Jesús-ni nna tti biyieninna uresi'e lhe tti bilenna gasina uttie, nianna tti unnena, rana:

—Nubiyú-ni gwalíba anka nuní Xi'in Tata Do Yebáha.

<sup>40</sup> Se'egaba ttu chupa ka benne nuila, idittuliba se'eke rulannike. Lhe'e ka benneha sela María Magdalena lhe Salomé lhe. Niha-gaba du María nan ge José-ni lhe Jacobo nu gwexxaha lhe. <sup>41</sup> Ka benne nuila-ni nuha gwanalhake Jesús-ni lhe bete náke lenbie tti rekie daka Galilea-ni. Ata se'eke gwelanniha, niha-gaba se'eru ixé ka nuila ka benne ugía lenke bie Jerusalén-ni.

*Jesús-ni bekatsike bie*

*(Mt. 27:57-61; Lc. 23:50-56; Jn. 19:38-42)*

<sup>42</sup> Tti chi ulha sá viarna, la sáha nuha chi rese'e tse ka benne Israel-ni ki udaxxuke sá reyaka lekeha, <sup>43</sup> la'ania nna ugía José benne lhe'esi Arimatea, benneha labí usinie gwatte'e lo Pilato-ni kini rennabe echide Jesús-ni lo ya kurusiha. José-ni anke ttu ka nu resá lagwi ge ka nu runi elhuxtisi ge ka benne Israel-ni lhe anágaba dogabe ribede isia sá innabia Tata Do Yebáha. <sup>44</sup> Pilato-ni uka ttebinna tti binana deki chiba utti Jesús-ni. Nianna uxi ttebana soldadu nu baninna adí ka soldaduha ki unnaba tisana nuha ganna si gwalí chi uttie. <sup>45</sup> Tti utixxi'en soldaduha na deki gwalíba chi utti Jesús-ni, nianna bote ttebane len José-ni.

<sup>46</sup> José-ni nna uyo'ona ttu lari sibi nna tti bechídana Jesús-ni nna bottesine lhe'e lariha, nianna gwakatsine lhe'e ttu baa uche'enna lhe'e

ttu íyya daa niha. Nianna tti bottulhuna ttu íyya nna gwadheana ro'o yieru baaha. <sup>47</sup> María Magdalena-ni lhe María nan ge José-ni lhe, lake bilákanie ata bigatsi Jesús-ni.

## 16

*Jesús-ni beyaka benbie lo elhuttiha*  
(Mt. 28:1-10; Lc. 24:1-12; Jn. 20:1-10)

<sup>1</sup> Tti chi ute sá tti reyaka le ka benne Israel-ni, María Magdalena-ni lhe Salomé-ni lhe María nan ge Jacobo-ni lhe uyo'oke ixé loo ka nu rure ixixxi kini sattabike lati Jesús-ni. <sup>2</sup> La dila bedulo xumanuha nna dila tteba si dáruba riria tatubisa-na, dia ka benne nuilaha ata bigatsi Jesús-ni. <sup>3</sup> Laka yu'uke nedaha nna ra luesike:

—¿Núru nuha kuana íyya yaya ro'o yieru baaha ganna?

<sup>4</sup> Aníha ráke kumu yalhá xeni anka íyyaha. Ttaka atti belannike ro'o yieru baaha nna bilákanie chiba bisila íyyaha. <sup>5</sup> Tti uta'ake lhe'e yieru baaha nna bilákanie do ttu nubiyú kwiti nukuna ttu xo ttuni. Sitsi túba anka xoniha nna dona daka ná bani ge yieru baaha. Ka benne nuilaha nna yalhá usikanie. <sup>6</sup> Nubiyúha nna rana ke:

—¡Bittu gasinle! Lebi'i regilale Jesús ge Nazaret benne betákana lo ya kurusiha. Benneha chiba beyaka benbie. Lanúrue tee nii. Gwalulanniruga ata utixxakanaha. <sup>7</sup> Gwaleyya nna gwaligasi ka benne rudhetinieha lhe gwali-gasi Pedro-ni lhe, daka Galilea-nila chi deyye daneru gaabie nna niha-liba ilenlee, attiba chi rabie le tti sa reki lenleha.

<sup>8</sup> Ka benne nuilaha nna boxunni ttebake be-riake ro'o yieru baaha kumu rasibakanie lhe rixidibake lhe. Lanú nu utixxi'akanie kumu de si rasilakanie.

*Jesús-ni bele'e loe len María Magdalena-ni*  
(*Jn. 20:11-18*)

<sup>9</sup> [La sá tti bedú ni'a xumanuha, beyaka ben Jesús-ni. Tti chi daa tsaniha, lade'a tte bele'e loe len María Magdalena-ni, benne bebeabie gasi ka espíritu xzegwiha latie. <sup>10</sup> Benne nuilaha nna ugíe gwattixxi'anie ka benne gwanalhake Jesús-ni tti do benbieha. Ka benneha se'eke du si'i leke lhe ribesike lhe. <sup>11</sup> Tti biyienkanie deki anka benba Jesús-ni lhe deki chi bilen María-nie lhe, lake nna laa ugía leke ge benneha.

*Jesús-ni bodola'a loe len chupa ka benne bed-  
hetinieha*  
(*Lc. 24:13-35*)

<sup>12</sup> Delola nna attu ya lela bodola'a lo Jesús-ni len a chupa ka benne gwanalhake bieha. Ka benneha yu'uke neda diake lhe'exxi. <sup>13</sup> Ka benneha nna beyekike gwattixxi'akanie adí ka benneha, ttaka nigaba ge ka benne chupaha a ugía leke.

*Jesús-ni ridhelhe ka benne rudhetinieha kini  
tsiake kixxi'ake ka tisa geeha*  
(*Mt. 28:16-20; Lc. 24:36-49; Jn. 20:19-23*)

<sup>14</sup> Iki deliba nuha nna tti bele'e lo Jesús-ni len ka benne sineaha tti yu'uke go yettaha. Utise ke kumu de ttu tsaba labí ridielhake tsia leke ge ka benne chi bilákanie bie deki beyaka banie.

<sup>15</sup> Nianna tti ra Jesús-ni ke:

—Gwaltsia itú tte yiesi lo yu-ni nna gwalik-ixxi'ani iyá ka benne ka tisa ge Tata Do Yebáha. <sup>16</sup> Ka benne tsia leke neti nna gadike inda, ka benneha godilába Tata Do Yebáha ke. Ttaka ka nu abittu tsia lekani neti, urixxi ukinnibe kana. <sup>17</sup> Ka nuní ka milagru uni ka nu tsia lekani neti: neti udettikana tti ebeakana ka espíritu xxegwi yu'u lati ka benne, lhe anágaba innegabakana attu tisa subi, <sup>18</sup> lhe meskiba udaxxukana ttu belha nna labí kisi'a nuha kana, lhe anágaba ganna i'iyakana bixa ttu nu dia venenu ikini labí bi dhakakana lhe ttixka ixxua nákani iki ka benne rani nna gweyakaba ka benneha.

*Jesús-ni beyapie deyye yebáha*

*(Lc. 24:50-53)*

<sup>19</sup> Iki de unne Jesús benne anke Xxanari'iha len ka benne sinea bedhetinieha, nianna tti beyapie deyye yebáha nna besine udoe daka ná ben ge Tata Do Yebáha. <sup>20</sup> Ka benne bedhetinieha nna biriabake rigixxi'ake ge Jesús-ni iyá laduba nna labe due rute nábie lenke, lhe anágaba len ka milagru ruinkeha rula'a deki nu rigixxi'akeha, nu gwalíba anka nuha. Amén]

**Ka Tisa ge Tata Jesucristuha  
Zapoteco, Santa Ana Yareni: Ka Tisa ge Tata  
Jesucristuha New Testament**

copyright © 2014 Wycliffe Bible Translators, Inc.

Language: Zapotec, Yareni

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 22 Feb 2024 from source  
files dated 29 Jan 2022

1fa271cb-de62-58fc-97c6-e1d0fa68b33d